




隱堂集

卷八之十 奏議



雲隱堂文集卷之八

相州 張鏡心晦臣甫著 子潛編校

奏議

操馭安南事宜疏

兩廣總督臣張 謹題爲邊防綦重操馭貴審謹報安南近日情形仰祈聖鑒事竊炤我朝授黎葵都統使奏貢上達安插莫首附交趾一隅耳四十年來黎使服貢無大缺失莫葵入寇合犯欽州責黎維新擒莫黨正罪西陷歸順禍延崇禎八年始結兩經題報往事昭然莫本犬羊何有恩義至于互相吞攫是其常性黎固伐莫莫亦侵黎交兵有年不自今日臣去歲于兩葵兵罷恭陳詳內略外一疏謂詳內者在我修備議防慎守邊圉略外者葵人獷悍互相仇噬未可全以漢法繩之也因齎進遲撫臣疏一月兵部止

據撫臣林贊疏中延莫緒殘屬彘之慮體貼圖存上覆未及臣疏也恭奉明旨這高平等處情形知道了但圖黎存莫豈得專藉文告還著該督撫按責令道將設法制馭以安粵疆卿部馳飭行欽此並責夫臣者職分之當然也臣隨馳書撫臣謂圖存兩字不得宣揚制馭之法但當密講誠仰窺聖謨淵深意在安粵又皇上差使臣楊爲相齎敕臨關獎黎恭順若告以圖有礙國體兼啟戎心續於十二年十二月二十日接南太叅將章易邊報見撫臣未及會臣以圖存明旨傳宣該彘該彘橫肆狡圖啟疆此自蛇豕常態卽在撫臣亦無非文告震懼但方獎忽圖彘是以疑圖人告人彘是以悖臣前總總相商益亦有慮于此也撫臣焦心攢眉大苦兵弱只事已至此惟有修備臣撫屬廣東靈欽一帶與交隔江攘外諸營與交錯壤不比廣西外土內漢臣獨力支東又同撫臣防西于二千里外臣之職分臣當殫竭惟是廣西兵戎簡練隸之撫臣有事之備所當早圖文告之加或難輕易伏祈皇上念國體邊防西南大事敕部將臣前疏與撫臣原疏熟酌情形通加覆議圖難于易制終于始庶道將內防外馭蚤作萬全收拾總在服島彘之心自可收折讐之效至臣與撫臣異同斟酌總期得當所謂從國家起見參伍正以相成也臣謹會知廣西撫臣林贊會同按臣左永圖具題伏祈敕下該部議覆施行謹題請旨崇禎十三年閏正月二十六日題四月二十三日奉 旨這制馭黎莫二彘事宜該督撫何得互有異同着該部詳酌覆議具奏

邊海急需道臣懇請敕部亟補以重地方疏

題爲邊海急需道臣懇請敕部亟補以重地方事竊粵東分守海北南道專駐雷州南則汪洋巨浸西與安南錯壤遙控瓊廉簡

戎督餉修練儲備悉屬其任況當交彘蠢憤邊釁已開借才蚤備  
尤屬要着自叅議莊元禎于崇禎十一年齋捧入賀未回近報本  
官陞任察處道務曠廢迄今已將兩載搆篆鞭長難及地方實懷  
隱憂伏祈敕下該部速擇才望道臣附近省分者推補庶得蚤爲  
任事以粵在萬里不比腹省也抑臣又有請焉用人于已效及粵  
中士民所頌服則有劉士禎曾化龍兩臣詰戎理餉除奸固圉燦  
然成績可考屢經廷薦非臣阿好兼之閩粵地近朝推夕任有事  
之日不敢不一公言之以聽該部之採擇也至巡海道羅定道嶺  
西守道海南巡道並應蚤爲除補敢一并及之謹會同巡按廣東  
監察御史李雲鴻合詞上請謹題請旨崇禎十三年閏正月二十  
六日題三月二十八日奉 旨該部知道

查敘會勦潮漳山寇功次疏

題爲查敘會勦潮漳山寇功次以副明綸以昭鼓勵事案崇禎  
十二年四月二十日准兵部咨爲微臣提兵遠出謹報守將功過  
以昭勸懲以責成功事兵科抄出兩廣總督張 題前事等因該  
部覆議具題崇禎十二年三月初五日奉聖旨王尙賢着革了職  
永不敘用詔安流賊張鏡心會同閩撫早行撲滅毋使滋蔓欽此  
備咨前來依卽咨移福建撫院及牌行廣東惠潮兵巡道移會漳  
南道速將詔安流賊嚴飭將總協同緝捕務期淨盡毋使滋蔓去  
後本年十一月隨據各道將先後擒斬捷功績報到臣該臣會同  
巡撫福建地方都察院右僉都御史蕭奕輔巡按廣東監察御史  
李雲鴻看得粵閩錯壤山水毗連賊之出沒無時彼此影射兵聚  
寇散兵撤寇來非寬時日而勤偵勦固不能得其要領所在也臣  
自奉有會同閩撫蚤行撲滅之旨鯁鯁焉同撫臣蕭奕輔同心商

確文移期會無時不進道將而申飭之不敢以逋逃縱也未幾而  
平和饒平交界賊警之報果至于是林宏等奏捷于先鄭芝龍大  
捷于後且將僞號大渠陳法贖縛而獻之則向來之號召綠林稱  
雄海界以出入于漳潮之間者根本撥而徒黨散滋蔓之杜庶幾  
無遺憾乎是役也各道將刻刻圖賊時時偵備不分此界彼界不  
問賊起賊伏一稟臣等先事之防行之故一舉全勝曾經按臣李  
雲鴻題報過擒斬十餘名而茲屬道將類敘臣亦不敢遺之也賴  
撫臣蕭奕輔謨著師中威行海上按臣李雲鴻捐金犒士發令先  
人及道臣謝上選署道事府官聶文麟決策制勝應手收功而推  
官王鼎鉉知縣丘金聲張明弼皆有共事之勞者也若副總兵鄭  
芝龍運籌有百發百中之奇剪寇有制敵擒王之烈功在封疆計  
先曲徙叅將林宏謀勇兼優威信夙著率歐奇黃光輝等驍雄勇

敢之弁累戰奏績計前後擒斬粵閩交界之寇已過百餘其救回  
人民更衆斯真表表之功哉總之論功以擒魁爲大鄭芝龍有拔  
本塞源之效而府官聶文麟捐厝犒賞鼓率接濟戮力于三四月  
之間勞苦過人又不敢不一拈出也除閩中功次臣不敢敘及外  
伏祈敕下兵部覆議敘錄以鼓將吏而勸將來庶會同撲滅之明  
綸可不至隕越也謹題請旨崇禎十三年二月十一日題四月十  
八日奉 旨兵部知道

### 敘蕩平尚寇功次疏

題爲百年負固之尚醜徹底蕩平四縣不稅之土田難容輕棄謹  
核敘功次據實報聞以昭鼓勵並請善後機宜以杜永患事臣惟  
廣東之有盤古十八峒等寇也所從來久矣山深箐邃蛇豕斯叢  
黨衆羽豎流劫四起其禍延境內而勦之斷難已者已悉之報勦

疏中不敢再贅惟是山峒綿亘包絡于清從番增之間者數百里  
內逼省會北近江虔西連徯排南臨大江恐其勦急橫奔致成流  
突臣會按臣移咨南贛撫臣王之良預飭道將分兵扼守又會牌  
行按察司臣王夢錫彈壓省會稽察奸細嶺東守道署海道叅議  
楊鴻嶺西巡道署守道僉事冒起宗並嶺南兵巡道今監軍道副  
使蔡秋卿及各州縣戒嚴兵伍督率把練到處防禦又會牌行裏  
海叅將鄧光汴惠州叅將施王政香山叅將王化行鎮標遊擊陳  
經武南韶守備周一誠清連守備鄒同埠把守水陸分扼信地不  
許逋逸而監軍道蔡秋卿總兵官許自強督率都司馬吉翔亦遂  
于十二月中旬誓師北出分道合剿隨于崇禎十二年正月十七  
日以後據各路鎮道將續報擒斬招撫捷功該臣覆查監軍道核  
報西北二路共擒賊四百三十七名炤初次塘報單多四十餘名

炤二次塘報單減十五名斬級九顆炤初次塘報單減一名二次  
塘報單減四名東路共擒賊二百二十二名炤初次報單多十餘  
名二次報單多一名斬級一百五十七顆炤初次報單減百顆炤  
二次報單減一百三十餘顆南路生擒一百九十五名炤初次二  
次報單減一百名斬級一百零一顆炤初次單多二十顆炤二次  
單少三十餘顆此皆臣等屢核屢駁令監軍道炤日報確造不敢  
潦草者若臣衙門報單冊所無盡行削去隨該臣會同南贛巡撫  
王之良巡按廣東監察御史李雲鴻看得峒寇之在東粵地連肘  
腋病絡肺腑誠腹心之毒也自嘉萬間勦之不果與以羈縻夫亦  
曰苟無大害蚊蚋不除乾坤之廣何阻深暗胷之不可化外置乎  
奈其山深地衍土日以墾生日以滋而不軌之藏亦日以衆遂致  
峒渠蘇鳳宇等祖父竊據號召徒黨勾連中外橫行劫掠故崇禎

二年四年連行題勦但剪其羽未撥其根草在蛇藏窟畱兔納如  
癰之潰如隄之決而莫之底止也臣與按臣採士民之訴見荼毒  
之痛破知府余自怡姑息之言用臬臣王夢錫勦除之議而又慮  
峒內生靈之被濫誅也勦撫並施嚴殺良冒功之禁鑒勦事不終  
之卒養禍也寬假時日爲徹底澄清之圖于是監軍道臣蔡秋卿  
親歷行間權衡功罪鎮臣許自強率都司馬吉翔分道並進慨然  
以掃除爲任先之檄文開之生路以散其黨外移江虔內嚴水陸  
以固其圍以五千之兵臨二千之寇形格勢禁以制其命未幾番  
禺知縣用間用購生縛僞王蘇鳳亭審明梟示而各峒之膽始寒  
矣自正月望後各路擒斬之報踵至臣皆按時日稽異同登簿籍  
而核之其堂堂正正執訊獲醜生擒四百三十餘名斬級九顆審  
明梟揭渠黨無逋藏之孽良弱無濫殺之冤使三峽田等峒盡歸

蕩定者西北二路之兵也其誘渠散黨用賊攻賊生擒或二百二  
十名或一百九十名斬級或百顆或百五十顆竭力彌雍文武共  
擒斬之功而士卒收敢戰之績使盤古等峒次第就平者東南二  
路之兵也因之夷其嶮阻焚其關寨伐其樹木使通道路存其茅  
房以安良弱鎮臣許自強復單騎關歷其中者數日于是歷勦不  
破之區爲四通八達之地而豺虎之伏藏無所容其隙矣是役也  
繇誓兵以及凱旋擒斬共一千一百二十一名顆而三監紀安撫  
峒民之籍皆班班可考實賴南贛撫臣王之良經緯宏猷救寧壯  
略牖戶之綢繆有脩潢池之流突不驚廣東按臣李雲鴻樽俎高  
名韜鈴偉抱運籌聚米有料敵之明電擊風馳沛如山之令且始  
而決策卒之捐賞皆超邁等夷之功也其文武在行間及共事則  
嶺南兵巡管監軍道副使蔡秋卿涵淵器識滿腹經綸才則左宜



右有而駕馭有方識則匣劍圍燈而鑒衡不爽其露處軍中親核  
擒斬真勞苦而功高矣廣東總兵官許自強沉雄若幽燕之檄韜  
鈴貯武庫之胸在事馳驅有因人駕馭之妙持籌矜重得萬全制  
勝之功按察司按察使王夢錫當道鎮出勦省會空虛之日以堅  
貞識力作根本輯寧督全都司僉書緝獲奸細巨盜李天培等消  
萌建威之功不可誣也嶺東分守署海道叅議楊鴻計先未雨事  
必早圖身提水陸之防懋著安攘之略糧儲道叅議署布政司黃  
日昌運解贖餉給辦軍需士挾醪續之恩軍作飽騰之氣嶺西兵  
巡道兼署守道僉事冒起宗蟠胸偉負應手宏猷戰攻屬組練之  
軍西南收曲徙之宴南路監紀番禺縣知縣謝泰宗識見警敏膽  
略不羣擒賊擒王功已首著又躬率鄉兵千餘擒斬渠黨近百名  
顯據功冊所開几與路將平分其功矣且安插撫衆咸稱得宜東

路監紀增城縣知縣陸清源精神敏捷才具挺拔從撫峒內擒渠  
正法足見實心任事册開該縣等擒功七十餘名可與路將鼎足  
論功且善後撫事勞績更懋西北二路監紀清遠縣知縣吳應旻  
快才若決定力不移因路將勦之多故該縣亦撫之易至其鼓勵  
縣民捐糧二千石銀一十八兩以供軍需雖地方仇賊之心而本  
官恩信得民亦可概見其在武臣則西北二路掌印都司馬吉翔  
智勇冠軍威廉邁等以有紀有律之師爲伐暴除殘之義斬不濫  
而執付士師則就死者服辜勦必力而苞蘖獮夷則就撫者無憾  
國士無雙登壇可券東南二路原任叅將李相陳焯以土弁歷行  
間駕輕就熟悉峒中之險阻用賊黨攻峒渠設間離賊收兩路之  
戰攻今據功冊所臚如破盤古峒等捷皆其功之昭昭在人耳目  
者也其他偏裨備把等功冊具存無庸臚列至于裏海叅將鄧光

沐香山叅將王化行虎門叅將胡文若都司僉書孫昌祚惠州叅將施王政鎮標遊擊陳經武總兵旗鼓郭啓襄南韶守備周一誠清遠守備鄒同埠或以水犀防浮海之奸或以陸兵扼要害之徑或消弭于省會之衝或遙制于山逕之僻皆著防禦之功扼走捩之勢雖亦斬擒纍纍但功在峒外不便入冊而旣收堵禦之功難泯備防之績者也其有輕重帶傷官兵容臣自行賞恤不敢概竇茲監軍道造報勦撫功冊齎送兵部查考伏祈敕部查議敘錄庶文武勞臣知所鼓勵而封疆其有賴矣抑臣再有請焉臣初題勦寇時原擬峒中之田還之峒中不利其有茲當勦平之後道鎮各官親歷其中有言深山廣原墾闢甚艱可當一縣之地不煩別割者有言四縣遼遠鞭長難制委之滋盜者有言取木爲材鑿石疊城川原紆繞營建甚易者臣與按臣往返商確批道查議蓋聞之

古人曰虺蛇不產通衢欲弭盜賊須培生聚增邑擴賦亦永賴之善策也因道詳未至未敢驟言謹因善後之慮而併及之謹題請旨崇禎十三年二月二十二日題四月二十三日奉 旨兵部知道

直糾貪弁以肅軍紀疏

題爲直糾貪弁以肅軍紀事竊得臣與按臣之議勦峒寇也亦綦苦心矣謂山徑坳深賊情譎詐非熟知地利者恐中埋伏非諳悉賊情者恐失嚮導于是有土弁之委而部咨立功官陳炤與指揮陳課又四年勦峒之弁也原任叅將李相之姪李承欽又臣曾用以征楚者也俾之分路圖賊誠欲資其一臂而賄撫縱掠屢經禁飭至于行間之令未論功先嚴罪尤臣申之事始者也乃不料其以撫爲市攫金于虎狼指勦詐人流毒于良善如三弁者大可異

焉陳炤勦南路者也指撫詐賊如下陂水象湖正徑等峒或一百兩八十兩不等蘇峒李婆大水邊等峒各八十兩不等聞其未勦時蚤已差腹心歛之峒賊又詐長山脚等村酒水頭牲又于瓦窰村捉勒鄉民保約梁玉祥何觀明林安梁子祥共索銀二十二兩則害及居民矣尤可恨者許總兵謂其接監軍道以撫爲市之論憤然截撫致撫賊出劫監軍差官幾至殞生又殺周峒已撫之賊欲以激變則狠而兇矣臣卽密檄查訪而嗜利貪賄該道正爲炤而發也此一弁者破甑不惜甘作餌賊之污兇狡異常大肆包然之狀陳課協勦西北路者也濫收峒虎多屬營求已見馬都司之報又用歐楚天黎縉爵爲腹心科歛簡泗長嶺大畝心等村各百餘兩不等許以招撫迨馬都司執正行勦賊渠何尙顯被擒供吐鑿鑿過付手筆見存又據賊犯黃觀養口供送銀二十兩仍有侵

匿牛穀等物則堂堂衛弁亦何顏之厚耶此一弁者佐勦二路非無尺寸之功橫索多金開滿囹圄之口李承欽以劣衿克把總之委佐李相勦東路者也除訪單不列據正月初三日滙江吉河士民里排黃德濬等二十七人聯名爲峒兵抄擄事內開宦姪李承欽率峒兵掠德濬家囊趕逐妻兒資財一洗鄧公型證鎖局龍聚塘村胡習堯聚堯爾敬秉奇瑞等銀九十兩生員曾飛鴻證一縱峒兵數名逼姦黃羅村徐氏新婦幾死一捲掠低田沙湖二村農民數十家都司提塘江瑞芝理論可證一抄掠貢生徐汝相家資財物一空并扁額打碎李清一等證又正月初八日西北路解賊犯單中一名黃觀養其繇具註送李爺銀一百兩則亦承欽之賄也又正月十一日據徐汝相訴爲挾仇詭陷事稱承欽捏相窩賊仇手陰中等事又據生員歐蘇林挺等連名二十餘人呈爲飛寃

陷儒事保結徐汝相被誣等情查監軍道功冊承欽擒賊不滿十人而慘害士民若此承欽之肉其足食手此一弁者磨牙吸血以士民爲可居之奇縱兵慘掠指勦賊爲詐人之路以上三弁皆當嚴行提問以示創懲者也至承欽所詐掠非僅峒中也乃良民也非出暗索也乃士民之公告也而李相可委不知乎其鈐東禪弁何在亦應量以約束不嚴並行罰治者也或謂勦功旣成三弁似應準過但查軍中之敗皆失于貪幸五千之兵促二千之寇有道鎮彈壓于行間得以卒事倘任三弁貪狡狼藉未有中賊之餌而不受賊之敗者也其養癰流毒又何可勝言哉謹會同巡按廣東監察御史李雲鴻具題伏祈敕下兵部從重議處庶罪狀明而有功者益知所勸矣謹題請旨崇禎十三年二月二十三日題四月二十三日奉 旨該部知道

調補要地州官疏

題爲酌議調補要地州官以資保障事崇禎十三年三月二十四日據廣東布政使司呈奉臣會牌帛得廣東羅定州逼處東西山地方猥獍土寇時常竊發防禦綏戢有難一日缺官者茲該州知州鄧三才被劾已久懸缺數月其署篆又借材三百里之外況今京邊練餉追徵甚急兼顧必致曠廢相應酌議就近調補會同巡按李御史牌仰本司卽會按察司及羅定道查議所屬賢能堪以調補官員作速具詳以憑會題等因奉此該本司署印糧儲道右叅議黃日昌會同按察司按察使王夢錫隨查化州進士知州趙士錦堪調補羅定州缺等因到臣該臣會同巡按廣東監察御史李雲鴻看得羅定州地方居東粵之西界處新拓之萬山控二邑而馭民猺最稱繁劇所藉以彈壓綏懷者非得才守雙優之吏弗

克勝厥任而愉快矧今懸缺已久曠廢滋深更當亟為整刷者查得化州知州趙士錦飲水潔守游刃長才履任兩周而百廢具舉四境乂安化地簡僻似未足竟其猷為者茲據議調繁難之區誠可資一臂而厝西鄙之謐如也既經該司會詳前來理合具題伏祈敕下該部再加酌議覆請將知州趙士錦就近調補羅定州缺其化州員缺另行推補庶地方均有攸賴矣謹題請旨崇禎十三年三月二十五日題六月初四日奉 旨該部知道

調補要地縣官疏

題為酌議調補要地縣官以資保障事崇禎十三年三月二十四日據廣東布政使司呈奉臣會牌炤得東莞縣逼邇虎門地方內外海寇繇之出入督飭防禦惟縣正官是賴茲該縣知縣汪運光已經察處新令推銓無期當茲糧餉徵解孔亟代庖兼顧難周相

應酌議就近調補以資料理為此會同巡按李御史牌仰本司官吏即會按察司速議就近堪以調補官一員即日具詳兩院以憑會題等因奉此該本司署印糧儲道右叅議黃日昌會同按察司按察使王夢錫隨查合浦縣進士知縣林有本堪調補東莞縣缺等因到臣該臣會同巡按廣東監察御史李雲鴻看得東莞縣當內外山海之輿區為省會門戶之要路地勢極其衝繁奸盜每多竊發即專官理劇尙慮疎虞若懸缺待推未免叢脞如或就近有可補之人則不得不通融議調俾資彈治者今查合浦縣知縣林有本鴻猷卓品實政貞心新發之型久道之化可決其始終有成也茲據司議移簡就繁俾本官得表見而地方獲奠安揆今時勢誠無便于此矣既經該司會詳前來理合具題伏祈敕下該部再加酌議覆請將知縣林有本調補東莞俾得聞命趨事遺下員缺

另速銓補則海邦並獲救寧矣謹題請旨崇禎十三年三月二十五日題六月初四日奉 旨該部知道

題明解發廣鏡已久疏

題爲廣鏡發解已久謹據實奏明以祈聖鑒事崇禎十二年三月十八日准兵工二部咨爲再酌調遣軍機併資內備實用事奉有福廣人鏡如議飭行之旨欽此臣卽一面搜借舊鏡一面造製新鏡刻期起解間本年九月二十四日又准兵工二部咨准臣咨前事該部覆看具題崇禎十二年八月十四日奉聖旨這廣鏡着解發東省一百七十門發河南三府一百三十門藩封所在尤宜多給各該撫炤數中途領收酌量分置以資守禦仍奏報查考欽此十二月二十四日又准兵部咨准臣咨前事該部覆查具題崇禎十二年十一月初十日奉聖旨粵省承平積蓄頗厚鏡砲之需張

鏡心着自行按湊前銀不必改抵欽此備咨通行到臣除一面行布政司再行催促間隨查得粵東先奉派援兵三千該折解安家行糧銀三萬一千二百兩已經布政司那措起解去後隨奉不必改抵之旨臣卽設處買辦鐵炭取辦工料并解運船脚等費造成大鏡五十五門中鏡一百三十五門次鏡一百一十門共三百門分爲三運頭運鏡一百門委廣州前衛指揮敘功實授都司施炯然於十二年七月二十八日押解起程二運鏡一百門委敘功實授都司何吾巖於十月初二日押解起程三運鏡一百門委肇慶衛指揮蘇萬邦於十二月初十日押解起程隨經督押陸續出境去訖備咨達部至差官係布政司姜一洪詳委臣給批刻期交鏡山東河南赴部銷咨不敢遲也至造解大鏡及點放兵匠工食路費等銀並奉派援兵三千名安家行糧共需四萬兩皆遵明旨

粵按奏該臣已設處并行該司庫貯按括補還原借遼餉稅契之數其經手督造則布政使姜一洪與原任都司今陞香山叅將王化行加銜守備陳王英也咨又准兵工二部咨兵部抄出河南巡撫李儂風題前事等因崇禎十三年二月二十一日奉聖旨這分發豫屬廣鏡久奉明旨該督還及時星催轉運毋誤急需該部飛檄行欽此欽遵移咨到臣該臣看得廣鏡解運近畿乃聖明嵩目防禦之急需也屢奉明旨臣卽捐厝造辦不敢損公家分毫于十二年冬盡數分運起解仍押發出境矣臣一面咨會山東河南二撫臣查收意其旦夕可到乃杳然未至上厯明綸臣不勝凜慄竊思解官係藩司詳委給批赴部時臣復咨懸功罪以核運之遲蚤法綦備矣但出粵以後其各灘之盤撥及解官之事故俱不可知而鏡體重大視閩加倍除臣再行督催間先具起解日期奏明其

該弁執批到部後至者敕行重懲如期者准與捐造二司官從優敘錄庶功罪分明運弁凜惕而臣亦可借手以報結局矣謹會同巡按廣東監察御史李雲鴻具題伏祈敕下該部施行謹題請旨崇禎十三年四月初七日題五月十八日奉 旨這廣鏡起解日期併委弁給批赴部知道了該部知道

### 再平潮寇疏

題爲潮寇蕩平謹核敘功次上聞以昭鼓勵事臣炤得近勦楚寇惟潮兵不調正欲爲潮備禦計乃賊至卽殺職官再至又殺把哨叅將擁兵而不顧各官輕率以試嘗一悞再悞罪何容道又經會牌嚴行該道移督叅將王尙賢統率官兵隨賊擊勦務期殲滅以靖地方倘再坐視定拏叅治去後九月十五日又該臣炤得近報土賊數百流劫揭陽地方業已牌行該道將嚴督官兵追勦未報

今遊擊林宏勦楚凱旋順經其地又牌行本官疾趨回潮協勦外  
隨又牌行惠州府推官張正聲亟移署惠州叅務原任遊擊朱之  
胤火速選督官兵前去會同王叅將確探前賊流剽處所四路夾  
勦獲功解報該廳仍炤監紀督率官兵賈勇聲援如各將總有逗  
邁退怯及輕進債事者俱馳報重處九月二十四日又牌行惠潮  
巡道及叅將王尙賢查前賊見遁何處官兵會否追獲因何絕不  
報聞文到卽日一面將情形飛報一面督飭總哨分頭追勦如再  
逗邁玩匿立叅重處十月初十日又該臣炤得潮州山寇流突揭  
陽等處又有王壽山詔安二夥爲患牌行該道移會潮漳副總兵  
鄭芝龍約會各處官兵把截要路直搗賊巢以清積寇十月二十  
七日又牌行按察司及惠潮道行令叅將王尙賢遵炤戴罪勦賊  
自贖火速親率官兵會同副總鄭芝龍并遊擊林宏等協勦務收

全功毋得以零寇飾報十一月初十日又會牌行惠潮巡道移王  
尙賢會惠州叅將施王政遊擊林宏務令殲大賊蕩大巢俾一方  
蕩定去後隨陸續據該道將呈報擒斬賊衆捷功等因到臣該臣  
會同巡按廣東監察御史李雲鴻看得惠潮地方皆萬山疊嶂谿  
谷深險林箐叢密奸盜遂因之踞爲窟穴而四出剽劫者所從來  
矣向雖隨時勦然旋勦旋聚揭陽竹橋一劫縣官張明弼聞警  
卽督典史陶鴻翊土弁鄭祖紹共率鄉夫追捕各賊反戈相向縣  
官則爲流矢所中尉弁並殞鋒鏑繼而把哨余師吉林明蜚等亦  
復斃之賊手此時之兇鋒幾不可嚮邇矣幸該道副使邵名世凜  
奉明旨承臣等嚴檄督集將士四路會勦賊始窮困奔竄據其追  
擊截殺前後擒斬共以一百三十計渠兇唐獨眼盧惟欽廖輝庭  
業已盡殲脅從散遁地方隨獲救寧是役也在信守失事者宜罪



雲隱堂文集 卷之八  
在追捕獲功者宜紀如叅將王尙賢逗遛玩寇已奉旨革職病故可無追論而把哨袁有義李英巡簡林學孔蔣鼎煥則經另案究懲死事官兵併行給卹矣若策勵圖功卒能收效則惠潮兵巡道副使邵名世署府督捕焯磨南有臺揭陽縣知縣張明弼皆奮灑池之勛削方張之寇一時蕩定勞績誠優至于潮州府推官王鼎鉉措餉足食捕盜通判黃中澹周防四緝程鄉知縣陳燕翼合圍捕寇而惠州府推官張正聲不眇視于鄰封親行監紀戮力合謀督兵執訊功尤表表守備李明奮勇爭先厥功稱最除署叅將事朱之胤已經另疏糾叅不便擬敘而惠州叅將施王政把總楊乾藍守鍵悉有擒斬之功皆當從優敘錄以鼓人心者也至于密運機籌飭勵將吏俾羣醜不出範圍而獲收底定者則前任按臣葛徵奇風雷號令振策于先現任按臣李雲鴻勘覈嚴明激發于後

而臣始得借手以無貽隕越也再焯此案功成已久因按臣批臬司核敘而臣又以閩粵蓄戎尙未靖掃故不敢先敘茲二省流氛渠黨已就薙夷謹據該司查詳前來理合具題伏祈敕下該部查敘庶人心激勸而地方有賴矣謹題請旨崇禎十三年四月初四日題五月十八日奉 旨該部議奏

### 直糾鑽營婪弁疏

題爲直糾鑽營婪弁以肅法紀事臣于本年四月初四日接分巡嶺西道僉事冒起宗一揭上開職于二十六日抵新興甫下車而署陽電叅將朱之胤投職書一封啟視之益聞部推廣東陽電叅將余圖鞏被糾欲以千金啖職免之轉詳憲臺求補此實缺也職憤恨欲絕當堂大罵其人逐之出隨具揭開報到臣臣不覺髮豎而歎不肖弁之大膽藐法至此也焯得朱之胤以廢弁委署惠州

叅將事務時因十一年夏惠州叅將施王政檄勦楚寇二源之役  
又惠州多事權令自效已經建有微功見在彙敘卽陽電一委無  
非望其濟勦海之急需耳而乃鑽窺部推之被糾妄意該道之詳  
補啖以千金貪緣陞補真奸人之尤而扞網壞法莫此爲甚者矣  
該道面訖直發可謂無忝憲臣但該弁署事三月有此千金何莫  
非從剝削中來耶所當從重提問以儆焚弁者也臣于是重有歎  
焉粵東天遠法疎積奸入髓臣經經于上日夕申飭愧不能洗濯  
其肺腸所恃以發奸摘伏惟二三司道是賴自昌起宗一再發貪  
足挽頽波若臣從前提究疏糾毫不寬假故有薦墨未乾彈章隨  
至者止係事之發與不發而臣固一刻不能待也至其所稱余帥  
被糾臣尙未接咨報而該弁何以卽知亦足見貪弁之供職無能  
營幹通神矣如果被糾事真伏祈敕下兵部一面覆議將朱之胤

重究一面蚤推能將以重海防而杜營競兩得之矣謹題請旨崇  
禎十三年四月初四日題五月十八日奉 旨朱之胤鑽營不法  
着先革了任該撫按提問究擬具奏員缺速推遴補兵部知道

議修要害城堡疏

題爲奉行設備明綸議舉要害城堡以垂永賴事崇禎十三年閏  
正月初三日准兵部咨爲欽奉聖諭事職方司案呈崇禎十二年  
十月十二日午時奉本部送司禮監傳出聖諭近報寇竊披猖邊  
腹城垣鄉兵器械亟宜上緊料理設備昨欽定保民四事全書卽  
着刷印成裏差官分投頒發毋得遷延致誤時日兵部知道欽此  
欽遵恭捧到部備咨前來俱經傳行所屬一併欽遵外本年四月初  
初五日據分巡嶺西道僉事冒起宗呈稱奉臣批據肇慶府高要  
縣及恩平縣韶州府樂昌縣先後詳呈修繕城堡工程等因到臣

該臣會同巡按廣東監察御史李雲鴻看得飭備之事莫先于城垣臣等自奉行欽書四事以來朝夕督課其通省舉行之勤怠奏效之後先一面備細詳具疏冊如期奏報外其有關係鎮城事工繁鉅及山海要害之區創起城垣寇盜出入之衝重整雉堞錢糧在數千金以上難以旦夕奏功者又不敢不拈出報明修創以圖永遠之計也如臣駐鎮城乃嘉靖四十三年自倉梧移之肇慶者其地北障重山前扼黔桂牂牁等水入海之口誠兩粵適中咽喉而西控邕管兩路之鎖鑰也維時因沿舊規未加增理垣低址促門無重城以臣忝兩藩之制擁數千之兵而規模陋簡若斯其何以壯于城而資彈壓也于是採地方之呈集道縣之議創起四關各門重城增擴週垣高廣丈尺非數千金不可高要知縣蕭琦殫精索已厝處多金節廠榷之贏餘任金湯之建豎臣與道臣復指

按核督于上不敢煩民間絲毫也其有民間急公捐湊建堡禦寇如恩平縣黃河崩者逕筦萬山要控滄海奸寇出沒雞犬晝驚士民具呈築堡修闢經臣等一批議而題簿願輸者頃刻以三千金計矣臣等一面鼓勵一面按辦務底不日之成以慰子來之義惟是韶州府樂昌縣修城一事則不無沿習濡滯之嘆焉樂昌兩經楚寇幾至不守臣與按臣戒心往事亡羊補牢鯁鯁申飭修築自未奉欽書之先而已然矣據其初估不過千金臣與舊按臣葛徵奇共爲捐處及該縣搜索無礙等項已逾六百餘金其士民又有捐助之議該縣官羅銘鼎誠肯實心任事崑勉興工此時亦落成久矣乃日復一日迄無半效至不得已按臣李雲鴻會臣行牌又有鹽斤銀量支千兩之行使縣官而皆若是也旣鼓勸士民之義有愧恩平又節省營建之勞遠歎高要卽曰樂昌培土而始興非

一彈丸邑乎舊任知縣蕭琦何以不煩公帑而舉事捷也除嚴督該縣策勵竣工外應行罰治以激其頹統竣事完之日與肇鎮城工黃河萌堡工等分別題報以重勸激者也理合具題伏祈敕下該部查覈施行謹題請旨崇禎十三年四月二十七日題六月十七日奉 旨該部核議具奏

舉行設備四事疏

題爲欽奉聖諭事崇禎十三年四月十九日據廣東布政使司呈奉臣案驗本年閏正月初五日准兵部咨職方司案呈崇禎十二年十月十二日午時奉本部送司禮監傳出聖諭近報寇竊披猖邊腹城垣鄉兵器械亟宜上緊料理設備昨欽定保民四事全書卽着刷印成裹差官分投頒發毋得遷延致悞時日兵部知道欽此又欽奉上傳事本年閏正月初三日准兵部抄出該本部題覆

前事內開修練儲備年來屢屢聖諭申飭告誡不啻詳且盡矣臣等凜奉逐一詳覈查叅立限奏報之諭旨分別地里酌定時日按期糾處以懲怠悞廣東定限六月初旬奏報等因具題崇禎十三年正月二十六日奉聖旨酌立限期依議以後過限的着卽嚴糾分別降級何止議罰這未經奏報各處原旨着部科覈叅何僅以申明塞責還着查炤屢旨日期遠近摘叅來奏欽此欽遵備咨前來案驗仰司查炤移行道府恪遵欽准限期速將四事逐件查核以憑具題仍將道府州縣職名分別能舉行不能舉行實蹟具報以便轉報薦叅違者并司道官叅題等因隨查原奉本部院批據連州知州王立準詳繳四事緣繇又分巡嶺西代管守道兼羅定道僉事冒起宗分守嶺東道叅議楊鴻分巡海北帶管分守海北南道副使唐顯悅海南兵巡道察調叅政陳以誠分巡惠潮道僉

雲陽堂文集 卷之六  
事謝上選等呈詳登報四事冊到司隨經分別修舉戰守完缺應薦應叅等官類造完備該本司署印右布政使林日瑞看得欽書四事係保民致治切要疊奉聖明申飭再三煌煌天語凡屬臣子誰敢泄泄從事本司視事之初嚴行申飭奉有憲限不辭日夜督催勉副本部院憂國奉公一念茲據各道府詳報前來謹據實分別開報等因呈詳到臣該臣看得設險守國自古志之兵械糧芻無事爲有事之備尤屬要着況四郊多壘聖明蒿目而憂凡爲臣子共有守土之責敢忘衣袵之戒所弗殫血嘔心較寢食徹宵旦以勉副明命者非夫矣臣自去冬奉行四事飛檄馳諭未幾嚴繪三至刊書屢錫與各路道府法語相規動色面戒使之露車按部手眼畢到以宣揚功令梟勉如格者七閱月而課冊次第畢集惟是地近邑饒手敏心靈之官又在道臣嚴明之下者恢乎及格而

其修舉方行堅整有待似可暫寬以待二次之考核若委靡延緩不及格之官則列名叅治何有曲貸茲據該司開報如道臣王夢錫冒起宗王道元唐顯悅蔡秋卿謝上選捐輸修練倡作于上而冒起宗王道元尤親身核視單騎周閱不啻身事視官家事視國不敢不一拈出以明功舉效臻實繇于此其在府州縣等官報四事舉行如格者惠州府知府梁招孟潮州府知府聶文麟高州府知府黃朝英雷州府署印推官董梅鼎廉州府知府王鑑連州州知府王立準德慶州知府王際隆化州署印高州府同知宋應昇欽州知州夏紹虞番禺縣知縣謝泰宗南海縣知縣朱光熙順德縣知縣王浸大增城縣知縣陸清原新會縣知縣王泰徵三水縣知縣高其昌連山縣知縣余懋儼始興前後知縣蕭琦周明偉曲江縣知縣陳豐頊新興縣知縣張復普陽江縣知縣孫自修陽春縣

知縣方詮封川縣知縣周洪德茂名縣知縣尹奇逢電白縣知縣  
兼署信宜縣印徐子瑜海康縣知縣徐行忠遂溪縣知縣慎思永  
合浦縣知縣林有本揭陽縣知縣兼署海陽縣印張明弼潮陽縣  
知縣李棚程鄉縣知縣陳燕翼饒平縣知縣丘金聲以上各官當  
奉行之始卽修舉燦然具載冊中斑斑可考從此振刷訓演日新  
月益何戰守之不優然乎內除高要縣知縣蕭琦備儲練三事已  
卓然冠軍因鎮城大修未竣應俟另敘外所當優錄以示鼓勵者  
也其四事之舉而未備與正在奉行者東莞縣署印增城縣知縣  
陸清原香山縣署印順德縣知縣王寢大新安縣署印通判張瑋  
新寧縣署印新會縣知縣王泰徵從化縣署印增城縣知縣陸清  
原清遠縣知縣吳應旻陽山縣知縣李子章保昌縣原署印韶州  
府同知喻承芳新署同知郭斌選乳源縣知縣兼署仁化縣印蔣

明鳳翁源縣知縣朱景運英德縣知縣吳永澄歸善縣署印通判  
徐中台永安縣降級知縣劉廷祚長樂縣知縣兼署興寧縣印黃  
景明四會縣知縣賴嫌恩平縣署印新興縣知縣張復普開建縣  
署印封川縣知縣周洪德石城縣知縣陳濟靈山縣知縣華見龍  
徐聞縣署印經歷繆正仕西寧縣知縣朱謀堡東安縣署印德慶  
州知州王際隆博羅縣知縣洪啓烜長寧縣知縣畢崇道儋州知  
州兼署昌化縣印趙履祥崖州知州兼署感恩縣印瞿罕惠來縣  
知縣陳咨託普寧縣署印潮陽縣知縣李桐澄海縣署印饒平縣  
知縣丘金聲澄邁縣知縣解學阜文昌縣知縣兼署會同縣印張  
安恭以上各官凜于責成不常拮据或苦于工大時迫或限于心  
長力短或出兼署之馳驅而不足似應姑畱餘地待再次核報以  
定功過者也其四事舉行不及格者樂會縣知縣王懷仁萬州降

調知州張璫樂昌縣知縣羅銘鼎龍門縣知縣戴上觀海豐縣署  
印經歷謝應科河源縣署印經歷莫鈞章龍川縣知縣朱議濬和  
平縣知縣今被參未奉旨張逢慶恩平縣降級知縣黃昇高明縣  
知縣兼署廣寧縣印崔琳吳川縣知縣徐鳴岐徐聞縣降級知縣  
吳國斗東安縣知縣曾光祖以上各官職司民社而武備不修雖  
奉行之始法亦難寬似應罰治以儆其始而作其終者也以上俱  
備臚四事完缺堪否戰守于冊中齎送部科查考是冊也臣行道  
親查而報之司該司又核冊而報之臣不啻慎矣然就該道報冊  
從寬中臣閣出如大埔縣知縣薛宏序鎮平縣署印縣丞張瑞圍  
實不及格而瓊州一府更不如式因該道陳以誠大計處分臨行  
報冊草草如臨高縣知縣胡宗瑜定安縣知縣廖錫蕃陸水縣署  
印經歷曾廷掄並應罰治而瓊山縣知縣林尙春雖城可及格係

舊制高大本官以久任之官儲款備疎亦難免于議懲至新任瓊  
州府知府蔣一鴻應俟下次核督率之功以定參敘也乃臣猶有  
說焉廣東之舉行四事也其便于他省者二其異于他省者一而  
與他省在異同之間者亦一粵地鹵濕土不可城從來有不及格  
之城無不用輓之城以輓城增修事半功舉故陸月之間次第成  
效而最卑小者須寬限以督之然視徹底輓輓者固已有間矣粵  
鐵粵鏡其工力皆取于本地故府縣實心舉行旦夕計效此二者  
粵之可因不敢不因之以圖永賴若草束全無實用綠粵兵水則  
舟山則步無馬也卽有亦焉所用之其草無北地之芻不過稻草  
可以薪而不可秣也雖各縣亦炤冊備註此不足爲有無難與積  
穀並程功罪者粵地半山半水無十里之坦素原多盜無兵卽發  
卽兵疎亦發凡州縣在山水之隈皆有官兵布散以爲防勦不專

侍鄉兵而今再加鄉兵之練兩者可相濟而益善矣不敢不據實奏明以明臣之勿欺也至道臣爲一路之統關係尤重心到眼到孰得而欺故臚之首爲府縣倡尤望敕部先加勸激以合屬之功罪爲功罪則綱領可提也若瓊雷廉所報自謂合式而尙不如式者臣必用定式繩之以俟續報獨是大計後粵官有抱蔓之悲如府正佐州縣等官共缺四十餘員四事罔所責成代庖有如傳舍臣實憂之伏祈敕下該部查議并選新榜甲科速補缺官前來則地方幸甚謹題請旨崇禎十三年四月二十七日題六月十七日奉 旨該部核議具奏本內府州縣等官如何缺至四十餘員通着吏部察明卽與遴補速奏

舉劾防汛將領疏

題爲遵例舉劾防汛將領以昭勸懲事查先准兵部咨該本部

題奉欽依以後督撫等官每遇沿海兩汛完日逐一體訪查炤九邊事例于歲終將大小將領分別臧否如有果賢從公議畱如其不肖據法議斥如其人地不相宜不妨議調等因備咨前來通行遵炤在卷今炤崇禎十二年兩汛已畢所有在汛諸臣例應舉劾隨牌行廣東布按二司守巡各道開造海防大小將領賢否文冊繳報到臣臣再加訪核別其功罪著者爲皇上陳之除廣州海防管叅將事副總兵陸萬里赳赳七尺之軀矯矯逸群之概墩下守備今陞廣東總兵坐營都司僉書陳坤文稱倚馬雄才武占橫戈絕技以上兩官新任地方例不概敘外看得廣東總兵官許自強才情斐疊意氣軒昂馭兵有隨機觀勢之妙當其條陳方畧規畫操圖其精神已燦然紙上矣潮漳副總兵鄭芝龍雄畧英姿鞭霆貫日義激鷹揚之烈風清鯉海之瀾而設奇制勝屢蕩寇氛半壁



東南久資保障惠州叅將施王政沉機密畫藏九地而動九天如  
首戡楚寇次縛叛兵至今甲子碣石之間潢氛喙伏桴鼓晝寂皆  
其彈攝之功也若飲冰茹蘖尤弁流所難廣東掌印都司馬吉翔  
蟠胷森然武庫草檄沛決江河其氣凝沉其識湛遠其力量瑰拔  
卓落如盤古峒之勦執訊獲醜未嘗濫戮一人而不雷不處中外  
謐如偉矣登壇之望潮州叅將林宏目無堅壘身作長城繕器蓄  
兵屢効摧鋒之績潮漳界上不可少此飛將軍也香山叅將王化  
行不辭勞怨獨任綢繆恩威久著於閩司壁壘一新於海表裏海  
叅將鄧光沐裘帶嫺儒雅之風韜畧具師中之吉克勤巡緝有裨  
安攘西山叅將趙千駟以捧盈執玉之操鼓投石超距之衆素稱  
廉勇式佇新猷雷廉叅將吳宣猷氣沉力壯守禦極其綢繆密擒  
叛撫之賊纍纍足覘方畧近以濶洲失事不得不爲分過耳肇慶

練兵遊擊陳經武英姿壯略屢殲劇盜聲施爛焉固是千夫之傑  
官虎門叅將事副總兵胡文若勛名素著旗幟方新虎門新造該  
叅當其創始經營之苦乃才具應之裕如也兩廣坐營都司僉書  
盧名成綜理詳悉號令嚴明雍容氣度居然儒將之風管兩廣旗  
鼓事都司僉書嚴遵誥義形敵愾職副傳宣馳驅不憚艱辛練守  
兼優撫馭一種沉毅之氣卓邁等夷廣海守備曹師和英標邁俗  
家傳文武之猷茹淡習勤風清海上近日雷廉巨寇頗多俘獲功  
尤足紀總兵旗鼓都司僉書郭啓襄深心密畫制人而不制於人  
鼓勇率先臨敵尤多勁氣管南韶守備事都司僉書周一誠器宇  
軒翥才情犀利召募選練執法無私軍中宜之東山守備陳良弼  
明作之氣雷厲風行亦有用之干將也樂安守備陳瑚恩能孚衆  
敏以赴功嚴未雨之綢繆奠安瀾於海窟候任旗鼓都司區成勛

練達之才明作之氣餘勇堪鼓水標守備何兆寧介冑起於章縫  
韜鈴出以廉靜可需大用以竟長才柘林守備曹炳先駿拔燕臺  
風清瀚海新型初試已露豹班嶺南守道中軍守備皮士器看劍  
有懷破浪守株徒惜寸陰馳驅王事不敢告勞於將母海北巡道  
中軍守備葉正芳傳宣稱職無玷官箴碣石寨把總黃夢選雕龍  
繡虎之詞兼優武庫白沙寨把總許大才慷慨籌時具見胸中韜  
畧是識沉而才裕者管南澳把總事守備歐奇訓練有方恩威服  
衆澳中資其桓桓列戟之良也管潮州標遊把總事守備李明士  
卒用命擒賊有功可當一面長城嶺西巡道中軍守備朱德先能  
循職守足任馳驅海朗寨把總李時茂巡防著績督造宜勞肇慶  
衛指揮王綬才致沉雄精神敏練肇慶衛指揮蘇萬邦緝叛首曾  
相功不可泯亦果毅之流也清遠衛指揮嚴耀宗小心達才戰守

俱諳以上各官或馳驅於海上或拮据於行間戰守互相爲用權  
奇各見其能所當薦揚以備擢用者也再查有管造銃器加銜守  
備陳王英修造有方備禦無失肇標西前營守備曾華矯矯虎頭  
猿臂足任前驅東前營把總徐時化機警敏給輸攻墨守兼長選  
鋒營把總程泰壯力雄才他日鷹揚之選西中營把總黎樹績連  
州善後四會分防卓有可紀之功遊奕把總劉奠邦容與鎮密紀  
律嚴明總巡把總李人龍才識透爽韜鈴諳練無忝熊羆之士西  
左營把總陳邦對偉幹修臂曾著摧鋒之效裏海下中把總李承  
錫忠勤克著擒巨寇如縛犬豕綽然名弁風規撫蛋把總李燦秀  
馭蛋有方地方晏如近日更著擒賊之效高州營把總黃萬奇才  
略可效一割近復斬馘多功惠州標營把總蕭龍一貌偉然歷試  
皆驗佳弁也廣標左營把總羅起鸞屢有戰功不負驅策中營把

總盧國英尙中善後正借綢繆潮漳副總標下聽用把總黃光輝  
投誠之後大著偵緝不可無以鼓之以上各弁或積勞堪念或長  
技可收不忍泯沒並敘及之以作其氣而致其功者也若夫不職  
之弁臣嚴核之得三人焉其一爲原任瓊崖叅將楊允文一本叅  
員下每歲例有扣支兵糧銀七百餘兩克作中軍雜流之用本官  
除此項外又於前營南定那大等處陸營共寄兵二十五名白沙  
舖前東澳等處水營共寄兵二十五名各存各營糧歸該弁以致  
兵力單弱見有前營等處哨官兵吳忠劉通毛英等證一本官保  
舉賊犯符元英爲南定營哨官未幾元英騙糧入已帶兵逃黎盤  
踞知道等村通共大盜劉光劫掠肆害以致臨高一帶居民屢苦  
黎患無不切齒一本官聽旗牌陳運陳斌等撥置索取營哨常例  
以致上年那大日南二營各兵盡數逃散見有把總劉季炳哨官

謝全勝等證一符夢熊通同符廷傑等賊於崇禎十年內劫掠儋  
州地方本官反遣陳策林立等持花紅魚鹽進尙求和以致夢熊  
等膽氣愈豪鎮海等處地方任意橫行本官一籌莫展怯懦可知  
一本官受吳春香藤賄囑釀成吳春跋扈之勢以致吳春於上年  
九月內大肆虜戮陵人紛紛逃竄時本官已到崖州聞變退避不  
加一矢及至本府計擒吳春事久亂定本官乃便過陵水掩飾從  
前玩縱之罪陵水之人無不恨之一本官於上年九月內巡海過  
澄邁地方先遣中軍李龍帶回香銀甚多遂有哨兵林琦家兵湯  
榮等乘機竊奪反將沿途舖司拷打責令賠補以致怨聲載道此  
一官者禦寇無能攫取百計去後穢聲昭著怨謗騰興終難逃于  
吏議其一爲雙魚寨部推把總戴維節一十二月有賊船六隻進  
儒峒港掠去哨船一隻燒損藤船一隻六船拋劄東港雙魚地方

本官任賊搶掠來去自如勒限出捕經年無獲一撫民官許三才出海獲賊梁一元並船隻贓仗本官坐視若罔聞知嚴檄緝賊自贖逾期不報一本寨每兵月餉八錢月扣三分從前陋規本官增扣四分指送禮備程爲名又本寨共十二船捕盜每節與生日共送銀九兩六錢每一哨官到哨得公堂程儀共一十兩一雙魚寨地方有織篋港船裝山貨等物週年約船五六十隻藉稱盤詰每隻抽取船頭銀三四錢又穀船約有十餘隻每隻索銀一兩上下方肯放船出港一本官凡遇兵稟假違限數日輒行罰銀如楊富則以違限扣月糧二兩伍進告退歷過月糧本官扣去銀二兩衆心洶洶一差兵把織篋港本官謂其賣放勒扣何平月糧銀二兩何鳳一兩九錢郭耀三兩本兵畏逃後扣月糧入已此一弁者蠅營狗苟全不知有自効至令部兵憤攻不服統領則亦不肖之流

矣其一爲欽州守備屠世儀一放兵糧扣減常例每次百金營中嘖嘖有口被該道唐副使發覺拏究左右尙冥然不知懲改一過客趙工部被劫株連多人本官代之緝拏縱差騙詐怨聲載道一本官受事二載營伍全不整頓朽甲鈍械不堪緩急其人有如木偶此一官者駑駘之足不任馳驅而鼠腹已盈難容克位以上三弁所當分別議處以儆不職者也伏祈敕下該部查議如果臣言不謬將許自強等紀錄擢用湯允文等分別議處庶勸懲嚴明而海防有裨矣謹題請旨崇禎十三年五月二十七日十一月二十五奉 旨該部核議具奏

請設水標守備官員以衛鎮城疏

題爲請設水標守備官員以衛鎮城事崇禎十三年五月初二日據廣東嶺西兵巡道僉事冒起宗呈稱奉臣會同按臣李雲鴻憲

牌肇慶水標重務宜將何兆寧題補實授守備等因到臣該臣看得肇鎮當兩省水陸之衝宿水陸重兵其間以防內外然陸營標兵久設遊擊統訓惟水標二哨舊兵一千餘名向止選委白衣把總管理此其職望既輕一憑詳委該弁亦悠悠處之無以効彈壓而課事功茲據該道詳議兵部敘功劄授守備何兆寧操守清嚴謀畧優裕委管營伍久得士心且勦寇著勞歷敘在案以膺是任誠于江防有裨緩急驅策可收臂指之用也既經該道議詳前來理合具題伏祈敕下兵部覆議如果臣言不謬將何兆寧授以守備銜管理水標地方幸甚謹題請旨崇禎十三年五月二十七日題十一月二十五日奉 旨兵部知道

雲隱堂文集卷之九

相州 張鏡心晦臣甫著 子潛編校

奏議九

議馭五種彘寇疏

兩廣總督臣張 謹題爲遵旨酌議具奏事臣接樞臣保邦十策中蒿目寇彘籌畫方畧奉撫按詳審議奏之旨臣至薄劣罔所弋獲職業所在僂俛圖度夫粵深山瀨海斗絕嶺外彘寇土司種醜猥繁意外之虞往往而有然陰陽不能頓爲寒暑彘寇不能驟爲患害凡釁之來必有其端端之不圖旣乃潰敗故未事周回當事維挽殫厥中人無致遲舛俶末之間亦有可效大要選練水師寬嚴撫馭樞臣先臣而言臣謹按粵事綸理其緒而陳焉計開一海寇治源委寇委于海而源于陸粵閩之交臣檄鄭芝龍扼其要領

浙賊不敢南向引帆粵海之氛探珠禦貨半窟新順等地往年捕  
急泛海出勦無具倩舟商人莫濟緩急臣倣古朦臙法購製三艦  
費各千金長各數丈合之三舟可實千兵翼以哨艇三千之師可  
具也頃之橫海出擊賊盡沉舟遁匿伏兵隘口纍纍就縛此後再  
有蠢竊窮源治委樓船之軍朝檄夕下遘制其命驚飈駭浪可以  
無虞一澳彞治哨攬廣島寓彞肇自嘉萬係佛朗機種類貿易之  
法敞于接濟蓋導番哨者粵人克攬商者閩人官弁通同實階之  
厲臣疏彈法治殆無虛日邇者倭販阻絕澳衆困踣誠得精敏道  
官真心執法嚴限酒米痛革勾引彞當仰命搖尾安受繚索一瓊  
彞審制馭瓊時海中可二千里正對占城而五指山彞又據瓊腹  
郡縣環其外叅備扼其要彞與寇不得合也熟黎與民錯處生岐  
窟穴深山似鳥獸狀時出香藤易我魚鹽受漢人勾引騙詐則爲

害臣檄叅將官秋冬駐崖州與守備犄角控制又飭有司遏絕奸  
宄馭以恩信則彞不爲亂若瓊之西北海口詰屈東南水石砰擊  
巨舟不敢泊亦不能入故無海寇之患一安南黎莫在相其順逆  
操我戎索不出以彞制彞之法一土司性悍如控生馬以微羈操  
煩策卒成不制近如田州謀襲武靖向武傷殘骨肉但寬其責討  
諭以法理久之自定此二事屬廣西撫臣詳奏無埃臣言之悉矣  
臣謹冒昧酌議伏惟敕部覆議施行謹題請旨崇禎十三年七月  
十八日題九月十五日奉 旨該部知道

請速補道臣以重交防疏

題爲謹報安南近日情形懇祈速補邊海道臣以重交防事臣頃  
具邊防基重一疏備言黎順莫逆圖順存逆非折讐之策而總歸  
于有事之備所當早圖仰蒙聖明採擇臣奉部咨一到卽立刻會

案飭行于本年二月二十七日據左江分巡道呈准南太叅將章  
易移報莫彝屢犯邊疆黎彝出詞抗悖屢檄不悛勢宜合兵堵截  
事等因到臣除臣一面會行飭防間炤臣離廣西彝邊在二千里  
之外一向道將之報撫詳而臣畧撫速而臣遲雖左江道詳報未  
到據撫臣之移自是的確夫兩江震動則雷廉亦震動蒙皇上允  
調閩將陳鵬補任廉海臣不勝感激惟雷州新道臣朱又煥報三  
月十七日在家新丁母艱雷地緊逼安南水陸並急震隣號號伏  
祈敕部速推就近才望道臣旦夕任事則地方之幸也又接撫臣  
會稿遵旨設法制馭一疏中云宣揚存莫未漏圖黎黎之悖詞因  
不封而來因宣諭而退但臣所據者當日道將報文已將原報悖  
詞始末備抄分送部科備察以明臣勿欺以明臣叅伍相成慮變  
之苦心有據而非得已也至于彝木犬羊變不可狃告黎黎悖存

莫莫叛匪徒無益又開口實兩彝蚕食疆吏並告而謂邊報晏然  
臣愚鯁鯁如處厝火亦惟炤部咨條覆僂俛督飭以盡臣之區區  
而已事關軍機彝情伏祈敕下該部察議施行謹題請旨崇禎十  
三年七月十八日題九月十五日奉 旨雷州道臣員缺著該部  
就近推補餘已有旨了

題荐考選官員疏

題爲爵人之權宜公器使之道宜審謹陳葑菲一得仰佐修省要  
圖事崇禎十二年八月初二日准吏部咨吏科抄出本部覆御史  
宗敦一條陳考選銓司官生三款緣繇三月初五日題奉聖旨是  
云云欽此欽遵備咨前來就經案行廣東布政司依炤確覈治狀  
詳報去後今據布政司察得程鄉縣知縣陳燕翼繇進士除授今  
職治行班班應炤例考選以勸循卓等因呈詳到臣時值按臣柳

寅東尙未入境該臣看得程鄉縣知縣陳燕翼文章經濟譽重東  
甌而操守玉白風抗其高雲垂其澤列選侍從允足羽儀清禁且  
俸薦合格歷核徵收無缺適符考選之例除將本官政績并經徵  
完解糧餉冊另咨送部外理合具題伏祈敕下吏部再加察覈覆  
請定奪施行謹題請旨崇禎十三年七月十八日題九月十九日  
奉 旨吏部知道

謝恩疏

奏爲恭謝天恩事崇禎十三年七月十七日准吏部咨爲欽奉賜  
扇事內開崇禎十三年四月十六日該內臣傳出欽賜各督撫金  
銀車扇三樣總督八員每員三金三銀三車巡撫三十員每員二  
金三銀三車傳出到部擬合咨送煩爲欽領等因到臣欽此跪承  
寶筵望闕謝恩外伏惟舜視廣開武哲玄覽爰裁片月始製重規

恭承我皇上擴明求輔緝雉紀祥九霄麟六月之征白羽來清風  
之賜漆腰金翼數應九華蜀繭湘筠霜生五嶺臣依親織筆仕粵  
操葵在軍中卽當夏不揮忽天上有施風之貺指揮士馬羨渭水  
之臨戎搖動馨香慚曲江之奏賦惟是寒清瘴海水肅炎方扇此  
賜人廣皇仁于樾下驅彼酷吏信片語于肆中障服朱丘永意風  
塵之靖時承商序常懷笏筴之恩臣下情無任忻戴屏營之至謹  
具奏聞崇禎十三年七月十八日題奉 旨覽奏謝知道了該部  
知道

酌議對調將官疏

題爲酌議對調將官以重邊方事崇禎十三年八月初五日准廣  
西按臣左永圖會稿內開本年七月十七日據廣西布政司經歷  
司呈奉本司劄付奉三院會牌焯得粵西地方在南太則內馭土



司外控交彛在潯梧則狼狽雜處奸盜叢生兩皆衝險要區彈壓  
綏懷必並得老成宿將方克勝厥任茲察潯梧參將成大用廉勇  
有聲征調戰功屢著南太管參將事遊擊章易謀畧素裕防禦邊  
境無虞又俸悉及瓜一旦遷轉兩地莫收其用相應亟行移會到  
臣該臣看得粵西潯梧南太一當狼狽雜處之衝一當黎莫交構  
之日均屬要衝近有五月初旬莫彛攻陷歸順之報則南太一地  
洵哉其尤重矣誠恐二官以俸滿待陞之人一有推遷不收就近  
任事之效茲據成大用累立戰功威名遠著章易才猷妥練堪佐  
內寧議就近以成大用調南太章易調潯梧各授應得職銜庶壁  
壘之色一新而邊徼得人所裨非眇小矣謹會同廣西撫臣林贊  
按臣左永圖合詞上請伏祈皇上軫念巖疆需人臣等爲地方起  
見卽祈敕下兵部議覆行臣等遵奉施行謹題請旨崇禎十三年

八月初六日題奉 旨

計典自陳疏

奏爲自陳不職祈賜罷斥以肅計典事臣年五十一歲河南彰德  
府磁州人天啓二年進士初授南直隸蕭縣知縣調繁定遠泰興  
二縣考選禮科給事中歷右左給事中陞吏科都給事中太常寺  
少卿大理寺右左少卿南北光祿寺卿洵陞今職伏念臣生長河  
朔出身寒細筮仕縣吏首尾六載蒙皇上獎拔置之謙垣謬有論  
白不避嫌怨迨佐常棘愈少善狀經兩內察皆荷包容未便斥逐  
此實高厚之恩臣弗克載也未幾備員南勳遽塵兩粵六年復屆  
罪釐益深三疏引身自知之明毫不敢昧頃當幽黜舍臣誰先綠  
臣南寺清簡尙可塗拙一擔封疆兵戎之事委非所任且能匪多  
人官乃兼職兩粵東西五千里莫彛跋扈殘陷二州在臣督屬無

所逃罪近而山程海寇一撲一起戢弭罕效其至如環誰司撫綏  
至尋介胄臣之債轅不言可見至于民生彫枯軍餉逋負吏治汗  
慢弁員媮苟綆墜剔蠹茫無寸展皆臣疚心瘵官之大也況一官  
廿載萍逐梗泛尸饗衰親失訓幼子經質之性鮮諒于人而髮毛  
霜落蹇足泥負水土不服肢體削瘵不顧其後必有顛越又臣本  
薄力詘之狀也昔人云物大于鏡則不能炤心昧于止則危其身  
殆謂臣今日者若再優容及其覆餗禔治何及伏望皇上特賜罷  
黜使還溝壑別選耆碩以任南履臣借茲無曠厥職以妨賢路卽  
計典震疊之威亦愈肅矣臣無任懇切惶恐待命之至謹具奏聞  
伏候敕旨崇禎十三年十月十七日題奉 旨

糾劾不職將領以肅軍政疏

題爲糾劾不職將領以肅軍政事崇禎十三年八月初六日准兵

部咨爲考選軍政官員事該本部題覆五年應考之期本部預行  
各該總督撫按官將所屬大小將領從公詢試如有貪酷庸懦老  
年有疾等項不拘名數多寡會同具奏議斥等因崇禎十三年六  
月十二日具題十六日奉有軍政武備所關在外的督撫按等官  
用心詢試據實開報也着勒限報部俱不許延徇瞻顧之旨欽此  
備咨到臣已經察行廣東布按二司守巡等道從公咨訪去後隨  
據各報前來該臣會同巡按廣東監察御史柳寅東覆加察核除  
年壯任淺及職業尙堪鞭策者不敢苛求外其貪縱不法公論共  
棄及張弛失當職業有虧者卽已去難寬指摘況現在敢容錯貸  
共核之得五人焉謹列款爲皇上陳之原任瓊崖叅將見任南直  
隸安慶副總兵湯允文一本叅員下每歲例扣支兵糧銀七百餘  
兩克作中軍雜流之用本官除此項外又于前營南定那大等處

陸營寄兵二十五名白沙鋪前東澳等處水營寄兵二十名各存各營糧歸本弁致兵力單弱官兵吳忠劉通毛英等證一本官保賊犯苻元英爲南定營哨官未幾元英騙糧入已帶兵逃黎盤踞知道等村通同大盜劉光肆行劫掠致臨高一帶居民患害無不切齒一本官聽旗牌官陳運陳斌等撥置索取營哨常例數百兩致那大日南二營盡數逃散把總劉季炳哨官謝全勝等證一苻夢熊通同苻廷傑等賊于崇禎十年內劫掠儋州地方本官反遣陳策林立等持花紅魚鹽進峒求和致夢熊等膽氣愈豪于鎮海等處任意橫行一本官受吳春香藤賄囑釀成吳春跋扈之勢致吳春于上年九月內擄戮陵人紛紛逃竄本官已到崖州聞變故避不加一矢及至該府計擒吳春事久亂定始隨便過陵水掩飾從前玩縱之罪陵水之人無不恨之一本官于上年九月內巡海

過澄邁地方先遣中軍李龍帶回香銀甚多遂有哨官林琦家兵湯榮等乘機竊奪反將沿途舖司拷打責令賠補以致怨聲載道此一官者禦寇無能攫取百計去後穢聲昭著怨謗騰興法難逃于吏議原任西山管叅將事副總兵降一級調用徐之龍一本官新任勒索見面銀五把總各六十兩十二哨哨各二十兩隊長每名四兩管班張才莫虎送進把哨林應葵謝勝等證一本官中軍已奉裁革濫受棍徒韓乘龍銀一百兩給與劄付書識區奇管班張才交送又每營虛糧一名共五名冒餉四十八兩李茂之證一新補把總每勒索拜見銀八十兩新補哨官每名勒銀二十兩新補隊長一百四十名每名勒銀四兩把總鄭芳莫廷爵等證管班張才中軍韓乘龍過送一本官指稱送總兵禮物票押五營各派銀三十兩共一百五十兩中軍外索每營銀五兩致兵鼓譟本官

將隊長李龍細打三十欲斫左手以塞其口通衙跟役跪求方免  
一本官聽中軍韓乘龍撥置每營派銀五十兩起造生祠完後每  
營派演戲慶賀二日費銀六兩酒席費銀五兩共費各兵銀六十  
兩李隆等證仍着唱婦杜京王愛陪飲又每營派花燈二盞于生  
祠至十五日夜本官親携寵妾吳氏步行出城到生祠飲酒至四  
更大醉扶歸西邑童叟共非笑之一本官于生祠演戲縱百戶吳  
廷爵家丁王成等開場大賭捕役鍾恩搶骰報縣本官差把總沙  
鳴鳳拏轉亂打幾死蕭忠救證一本官署鎮時需索中部新補把  
總易雲龍見面銀不遂輒以夜晚升堂發放來遲提解雲龍畏懼  
送銀六十兩一本官署鎮不循往例竟僭坐總鎮公堂卽以本官  
條記用于牌票行仰各路叅將以致各官不平此一弁者才貌軒  
昂中情濡染剝軍建祠官箴盡裂前之鑄級罰不蔽罪原任廣州

海防管叅將事今陞南京管小教場事前軍都督府僉書黎延慶  
一本官勒索每把總見面銀三十兩十二哨官每名六兩隊長一  
百四十餘名每名銀一兩把總盧維翰萬一龍等證一本官凡遇  
新補把總到寨每員勒送見面銀四十兩哨官銀八兩隊長二兩  
把哨羅上進陸世奇黎民泰陳得勝等證一本寨水陸目隊兵每  
季共領餉銀四千三百餘兩每兩扣銀二分共銀八十六兩一年  
共銀三百四十四兩通寨把哨周鳳陸世奇等證一本寨水陸營  
把總盧維翰羅上進縱令部兵串賊打劫石園民人盧德林家財  
本人具告本寨二總懼罪共送銀八十兩寢閣不結盧德林證一  
本官乘見紅彝船越至虎門卽發捕盜陳應魁陳秀三號船三隻  
前去燒奪彝船後彝知覺遁去及將前船三隻燒毀復指賠船爲  
名扣除通寨捕舵每名銀三錢目兵每名銀二錢約銀四百餘兩

除賠船外尅落銀二百餘兩通寨各兵證此一弁者才優治旅計巧鑽營納賄尅糧穢彰去後益掩飾之計窮而貪汙之狀著法應追論以上三弁皆當罔例從重究擬者也見任都司僉書管南韶守備事周一誠一本官以韶屬兵糧多寡不等議通融支放致兵目激告見在候審一本官以代捕巡簡蔣紹隆擅禁營兵出言不遜輒自揮拳毆辱府官目擊失體殊甚一本官尅減軍糧及散時藉口除債將銀擡進以致軍士陳富馮大畧等訐告一崇禎十一年七月內到任勒取拜見韶營隊兵每名銀一錢衙蠹張德懋過交一把總裴天朝帶兵一百名前往谷溪水日久缺米前往宜章縣糶米該司密差中軍官丘標至谷溪水察點不齊兵三十名每兵用銀一兩二錢方准銷名供役一派各新兵于崇禎十一年八月起每兵每月扣銀五厘共銀一兩九錢供養書記羅紹賢劉壯

元況書記皆寄有糧在營又派各兵以致不服此一弁者秉性剛愎居心點染處積弛之地始未嘗不加意整飭而晚節不終致滋物議雖才力不無堪惜應以浮躁例降調者也原任廣東操捕都司僉書今陞福建總兵鎮下遊擊管坐營事孫昌祚一本官性質疎庸惟圖逸豫管理廣州中左前三營操務二載以來全無訓練惟聽把總苟簡從事致軍卒驕玩一本官職任操捕其城守巡緝是其所司卽寇盜竊發之時亦不親行點察城軍嚴加禦緝從來未獲一盜一本官管理局務例徵局役銀兩轉解布政司給造軍器匠作支用本官惰悞不催歲多缺額一本官籍隸本省日與親知褻承微行恣行沉湎有失官常此一弁者才具疎庸任操而操兵無法任捕而捕務不嚴理局而局銀盡缺職業虧多醉鄉癡重應以不及例降調者也以上各官俱應分別罔例處分內黎延慶

雖以打點事露奉旨回話然贓款在粵豈容漏網不敢不并糾也  
伏祈敕下兵部再加察訪如果臣言不謬將湯允文等分別究治  
庶于戎政一清而各弁知所悚惕矣謹題請旨崇禎十三年十一  
月十三日題奉 旨

修繕端州城垣疏

題爲奉行設備明綸議舉要害城堡以垂永賴事崇禎十三年七  
月二十三日奉聖旨是王夢錫等三十七員俱着吏部紀錄蕭琦  
俟城工完日另敘陸清原等三十一員俱住俸料理蔣一鴻等二  
十員俱降二級炤舊完日一併開復欽此欽遵抄出到部備咨前  
來依經備行布政司通行道府州縣欽遵察炤修舉另報外隨察  
得肇慶鎮城事工繁鉅與黃河壩要害之區創起城垣錢糧在數  
千金以上難以旦夕奏功其樂昌縣修城沿習濡滯應督策勵竣

工先經另疏具題去後隨准前因今炤黃河壩與樂昌縣各城工  
尙未報完而肇慶鎮城已據高要縣報竣先奉有蕭琦俟城工完  
日另敘之旨相應摘出詳敘會同廣東柳按院牌行本道卽將鎮  
城完工一案先行摘詳以憑覆核具題其黃河壩堡城曾否完工  
亦速察催另報等因奉此據高要縣蕭琦申報奉臣批據府屬鄉  
紳士民呈稱端郡鎮城請乞恢廓重垣等情仰肇慶府察議報蒙  
府脩牌仰縣會議卑縣會議察看得端州縮東西兩粵之樞爲節  
鉞坐鎮之地維垣維翰保障允資防潦防寇綢繆孔亟此通郡士  
民所群籲而遐陬華藝之具瞻也今蒙批府州縣公同登城畫議  
原城之巔加填實土五尺覆新磚于面環砌馬道一衢然後平加  
堞墻二尺五寸上壘粉堞二尺五寸計增新僅五尺之數合培舊  
有一丈之觀矣更敞立月城內外有護添高窩鋪遠近可覘二面

砌磚以絕板躋四門設柵而杜作踐雖城樓勢必鼎新而修改計當徐就應俟全城改觀之日再畫層樓卜構之謀蓋事理必次第以酌裁也卑職隨擇僉管工者民鄧應芳李春芳等開具姓名各分任督理并估計各料價工費手本前來卑縣一一覈實卽給銀兩當堂兌領爲預辨支用就于十二月初十日槩行興工若東門之外舊有高埠上建閣江樓巍處大海險阨全流誠一鎮之門戶與城垣相表裏者也且防海之兵船夜泊之商艘常聚斯焉昔之建樓所以固地軸實以閱水操舊模旣隘年久而傾蒙部院飭諭一併鼎造職遵卽備料鳩工同城事並竣儼然水陸天塹之勢矣等因又據該縣續報繕城設備明旨煌煌肇府士民又以金湯之圖籲呼于部院之前下令首捐先後共發銀二千二百兩從民望也討地利而平工料時有董諭無滋他捐防民累也自去年冬至

今年秋止四季于黃江廠共派銀二千八百兩順輿請也協捐風起卻辭者衆以各有守也如此而吏不虔子不來法詭安所逃辜故價平而人趨人趨而工倍視興舉之期將週而畢以言乎形勢凡修城垣周圍共八百八十七丈有奇全城內外兩面皆砌磚石並有欄馬環牆有逼仄處酌售民基益之則皆基厚一丈三尺矣新填實土五尺磚覆馬路然後外加馬牆二尺五寸監塚子二尺五寸通計增數五尺其勢倍舊一丈則形高三丈一尺矣重城月環窩舖星列諸樓易朽換新每門登陟之處設立柵欄門一道以時啓閉杜人畜作踐此一成而永逸者如閱江樓東西南北分立四廳各高四丈一尺四望河山在指顧間閱操則軍容以整扼勝則下流以柱其于城工相差等也次第而考捐助之數李按院則以百計原任肇府今陞嶺南道蔡副使則以三百計嶺西兵巡

道員僉事則以百計新任張知府則以四百計署肇府事丁推官則以五十計本府督捕許通判司厥務則以四百計嚴旗鼓則以三十計水標何守備與北岸營楊把總則各以十五計王指揮則以十兩計鄉紳梁銓部則以百計變賣何奇逢鹽價則以二十一兩計變賣朱材竹價則以一十一兩計原庫貯修城銀則以二百九十六兩五錢計如卑職琦司權黃江厥于去年冬季再權于今年之秋清蠹核匿共得三千稍效涓埃之助皆出朝廷物力部院與道府恩推于職何有哉始終造繕實實不損民間一粟未煩踐更一日故前後通計所出之銀共九千八百四十八兩五錢分計所用之數費于城工者六千九百五十二兩一錢費于闕江樓者二千八百九十六兩四錢詳冊具報未敢畧也次第而計効勞之役縣丞徐策旦夕督率併售基卻價庠生黎應宿程寬與義民李

實佳之慕義廉勤執役耆民鄧應芳等二十四人之急公微勞具在似未可泯也凡此職據實上聞方任始興當彈丸僻地城工之與練儲備猶晁勉修舉未敢自後況處重鎮鞭策之下奉明旨切責之嚴敢息厥職以貽尸曠與爲此一一臚列仰聽憲裁緣繇該臣又批該道府查覈確報到臣該臣看得春秋城築必書易戒覆隍書稱勤墉明乎保民之大無以易此况肇鎮據兩粵之衝縮華燹之重尤百城標表臣等奉欽頒之書詢厥僉謀式闢舊制下令之始首嚴繹騷次禁塗飾謂制不備弗壯事不創弗備雉堞弗峻無以寢不虞表裏弗堅無以垂永賴本以爲民而累民貲力設官之謂何又築怨而不可爲令也以言修建之費城故塼造而內亦甃塼內外如一其工倍增加五尺實土結塼高滿三丈濶三之一其工倍平城之上設內外欄墻而外之欄墻加堞堞睥睨周城之



雲陽生文集卷之九  
外建四門重城而重城之樓概暈飛鼎峙其工倍至附城之闕江樓表裏河山宏基就圯然粵東水犀之旅是訓是禡于斯憑焉巍然並舉以增天塹則其工又倍于是計費以九千有奇爲時則浹歲而竣此臣等所以仰遵明諭而不敢以文具從事者也以言營建之勞前任按臣李雲鴻以轟雷掣電之才當攬轡觀風之日倡先不靳號令維嚴原任嶺西巡道冒起宗才同切玉截犀謀實誠龜肇板爲時最久宣力獨先新任署巡道印務水佳胤端方衡尺不移綜核秋毫必炤受事未久捐措克同原任知府蔡秋卿精心密畫爰始爰謀建議于前現任知府張瑀粹品長才必躬必親克終其事通判許鳴代署印推官丁繼善損貲助料共贊其成高要縣知縣蕭琦瑩守織塵不染鴻才四應咸宜捐措獨多規制備美鳩工庀材始終悉出一手且工必平募價惟市值民不知役而功

已屹然皆其力也鎮下旗鼓等官嚴遵誥何兆寧楊士龍王綬縣丞徐策並有耶許之助同殫拮据之勤在籍原任吏部主事梁應材居鄉恬介足未履乎偃庭公事轉輸義獨先于士庶以上捐助之數具列疏中無煩再贅生員黎應宿程寬義民李實佳等售基卻價好義足多管工者民鄧應芳等趨職効公終事惟謹不敢不據實臚明以祈聖鑒抑臣尤有請焉臣衙門移肇以來六十年矣城制卑薄因沿固陋同此物力豈憚經營亦任事之難其人耳知縣蕭琦一味真誠全無粉飾權厥僅六月清羨三千金米藥之操卓冠流品況先任始興繕城合格再調高要三事首舉已經題明未敘茲者事大于因功多于創善建不拔非本官身視官而家視國何能有此新按臣移臣有金湯之壯甲于嶺表安得粵城盡如斯者勸激之心不謀而一原奉蕭琦工完另敘之旨不敢不表而

出之以信明綸至臣駐節所在幸落其成以地方之物力還地方因諸臣之僂俛爲僂俛何庸齒焉臣謹會同巡按廣東監察御史柳寅東具題伏祈敕部覆覈將在事諸臣從公敘錄蕭琦另與破格優異庶鼓勸明而四事之風厲益遠矣謹題請旨崇禎十三年十一月二十六日題奉 旨

題請給繇疏

題爲給繇事竊得臣見年五十一歲河南彰德府磁州籍山西襄垣縣人繇進士天啓三年除授南直隸徐州蕭縣知縣四年調繁鳳陽府定遠縣知縣五年調繁揚州府泰興縣知縣崇禎元年考選北科給事中二年補禮科給事中巡青兼巡視皇城四年陞本科右給事中五年陞本科左給事中六年差江西典考事陞吏科都給事中管理大計七年陞太常寺少卿九月因前任考選科道

事奉旨降一級紹舊十二月陞大理寺右少卿八年陞本寺左少卿南京光祿寺卿十年五月初三日該吏部爲缺官事會推題奉聖旨是張鏡心陞兵部右侍郎兼都察院右僉都御史仍帶降一級總督兩廣軍務兼理糧餉帶管鹽法巡撫廣東地方寫敕與他欽此該臣以邁疾控辭至本年七月二十日准吏部咨臣辭疏奉聖旨兩廣重地張鏡心以才望簡用著作速赴任受事不得引病控辭該部知道欽此欽遵隨于本年十月二十八日到任十一年六月該臣題爲楚寇分道入犯官兵力戰堵回事奉有張鏡心戴罪勦賊事平開復之旨本年八月間該臣題爲遵旨會勦楚寇恭報大捷事奉有這會勦獲捷先聲已壯著益鼓勵各路道將合期奮擊速蕩楚氛之旨十月間該臣題爲粵兵遵旨搗巢已經蕩穴擒渠事奉聖旨奏內文武將士各功著巡按御史核明具奏兵部

知道十二年八月該吏部爲湔除事題覆臣原帶降職級奉旨開復扣至崇禎十三年九月二十七日連閏實歷正三品俸三十六箇月例應考滿給繇伏念臣一介蒙恩叨冒三品前任光祿已及二載茲塵兩粵忽逾三年僂俛戰懼靡有朝夕自初抵粵時戴罪會勦楚寇奉事平開復之旨臣躬討二源賴將士之力幸奏蕩平屢經題報迄今事平已二載矣祇覺力小任大辜積愧深分應待擯寧遑祈免頃當遵奉大典祇赴闕庭聽候顯斥緣臣奉敕總督兩廣軍務未敢擅離伏祈敕下吏部察覈奏請定奪施行臣無任悚慄待命之至崇禎十三年十月初三日題十二月十四日奉旨吏部知道

恭進興屯全書疏

題爲恭進興屯裕餉全書事崇禎十三年十一月十三日據廣東布政使司呈奉臣案驗准戶部咨戶科抄出本部題前事等因崇禎十二年十一月初二日奉聖旨是這興屯裕餉全書卽着頒發邊腹文武印正等官着遵書內諭旨條款今冬預將農具牛種整理完備開春卽恪實舉行仍責成各該督監撫按屯田官核其多寡分等勸懲竭力鼓舞務臻實効如有怠玩虛應者一體治罪欽此欽遵抄出到部備咨前來臣隨行牌仰本司遵炤間又經備移各道嚴督各府廳州縣衛所等官將舉行興屯事宜覈實炤頒欽書各條款逐一登荅明白造冊移司據司開送各道屯田共計通省清墾過軍屯五十三頃九十四畝四分二厘二毫民屯七十四頃二十畝零兵屯一十八頃若商屯原係鹽商輸粟於邊以克邊儲聽其行鹽銷引此在淮北山東等處有之粵東從來所無故俱未有報墾總之僻壤荒陬似難與他省程功而尺土寸田亦可廣

公家額賦內分守嶺南道王叅議分巡嶺南道蔡副使奉行方始  
清墾惟多非其國計之關心安望軍需之克濟分巡海北道唐副  
使以無屯之地作裕餉之謀化甲冑爲溝塍奉行最力責殷陳於  
什伍鼓勵特先並請題敘以昭激勸其餘各道或絕溢先加致冊  
報之有限或屯田無載尙勸關之維艱則爲時無幾亦處地使然  
且現在多方清釐督率當俟成效漸臻另敘者也其兼管通省屯  
田掌印屯鹽道曾副使已經離任署印分巡嶺南道蔡副使方屬  
代庖應否併敘統乞憲裁又察得番禺縣知縣謝泰宗署東莞縣  
事增城縣知縣陸清原順德縣知縣王寢大清遠縣知縣吳應旻  
署新安縣事廣州府通判張瑋連州知州王立準所報墾屯或以  
數十頃計或以頃計并廉州府把總蘇斌胡儼守備葉正芳似應  
併敘用勵將來等因呈詳到臣察得與屯一事乃朝廷急務本部

院文徵手書幾于頽秃舌敝今據冊報府州縣所墾軍民兵屯田  
土爲數絕少有僅數畝或止一畝至有一府全無者甚非所以仰  
承嚴旨責望裕餉至意茲炤欽限久稽除按冊先行奏報外仍應  
嚴行清墾會同廣東按院柳寅東牌仰布政司及屯田道即便移  
行各守巡兵備道速再督行各府州縣衛所炤原頒欽書款項力  
行開墾清覈確數續報以憑另報勿得虛視功令致違明綸仍催  
惠州府屬速報去後隨該臣會同巡按廣東監察御史柳寅東看  
得與屯國家第一要務況在今日尤對症藥石恭承聖明刊書布  
令臣等僣俛從事期于清故墾新不遺餘力與屯田道及守巡道  
交相申飭除遵旨具職名報部外文移之後繼以手書幾乎頽盡  
舌枯矣據各道開報前來再行布政司覈明冊報所以凜奉明諭  
懼有飾少爲多規無爲有之弊耳茲者司核已明計實墾民屯七

十四頃有奇清墾軍屯五十三頃有奇實墾兵屯一十八頃炤欽書上中下式有及有不及而要之特其始事也諸臣不得以此自畫臣同按臣之所以督責于上亦正方新未艾特因部限已屆罔敢後期遵炤功令奏報以虔其始卽部覆條款中所謂驗與屯之端緒者也至各道報有原無屯田者見隘土之創艱亦有絕溢先加者見清加之法窮而司詳謂僻在海隅不比中原塞上卽部議東南有可耕之民而無其田也雖然山陬海澨卽荒涼斥鹵若官勤而令善亦必有可觀之績如現報之民屯兵屯九千餘畝亦自無而之有軍屯五千餘畝自清故而得新則各道臣及府縣等官自難退怯以違功令者緣係遵諭報墾過地畝數目謹將各道府州縣職名下清察開闢多寡有無實數分款造冊送部無敢隱飾憑部覆疏分別殿最若向後續舉屯田容臣等依期再報理合具

題伏祈敕部覆核施行謹題請旨崇禎十三年十一月二十一日  
題奉 旨

廣省修城積穀疏

題爲恭陳一得之愚懇乞聖明裁擇以資鞏固事崇禎十三年六月十三日准戶部咨戶科抄出該本部題覆廣東巡按李雲鴻題前事等因奉聖旨是該省鹽斤炤李雲鴻議加之數再增一倍及府州縣請詳支發按臣每年終造冊報部俱依議行其廣州府修儲事宜着行該撫按酌妥速奏欽此欽遵抄出到部備咨前來案行布政司并鹽法道一體遵炤去後該臣炤得省城爲粵海一大都會五方之衆咸託足焉固圍銷萌無容以疎備啓戎心今察卑薄之處跳越之跡無如越王臺一帶萬一有故得下瞰城內便不可支故當增而高之以爲周衛至城中煙火旣稠宿春不備大姓

雖繁貴金賤穀脫有兵荒補救無術憂不在外而在內其新會官田義倉租穀詳載賦役全書並詳請按院查核而司府有會計之責應蚤蓄緩急之備至於戶積之法責鄉紳士民富有德者僉題則無追呼之擾還藏其家則無般運之苦糶炤時值不責其蠲則無損折之患合行察議備牌于七月十四日行仰布政司及嶺南巡道各行廣州府速將前項城垣低薄應修者修應增者增倉廩空虛應積貯者積貯鄉紳士民戶積之法並行會議勸輸以裕儲特通詳兩院以憑察奏去後十月初五日又該臣炤得積儲國之大命荒政民之必需蓋天災流行何國蔑有人事多備以食爲天卽在承平尙防意外況今中外兵連足懼歲凶可虞庾旣折半帑少宿金官已用三民無擔石其公私之罄洗久矣兼以南番之市雜集五方徵逐之風惟圖旦夕人止見金家靡貴粟卒有饑荒其

胡以濟目前燕趙齊魯青徐宛豫荆楚吳宋之地水旱並告死徙顛頓有拆骨易子之慘蔽平掩壑之瘠良由儲蓄不先而拯救無具也欲炊饑民而塵不可炊屢弛糶禁而糶無所出內帑發萬金不能博二千之粟素封捐千金不能市二百之米則備之不豫其禍彰彰而籌之有素其利什伯萬不得狃安熟而迂荒政之修明矣況屢奉明綸申飭薄海凡百有位其得漠然本部院節核曠贖等項在各衙門者約省之下尙有贏餘今發五千兩行廣州府發三千兩行肇慶府發二千兩行南韶惠潮高雷廉瓊八府爲糶貯之舉爲此牌仰布政司及各守巡道轉行廣州等府南番等縣分頭委確當廉能官員趁收刈價平之日買完上倉勿出一月之外至藩司鹽海等道但存節餘于官帑皆可爲惠于百姓若府縣等官爲民父母職其饑寒禱穀之求不待荒歲務大家揆括殫力嘔

心以廣積貯勉完數萬之藏以備非常之賑至于省會各倉細覈舊儲可近十萬但委官出納夙徇情面或追或逋尙非實數切念未備者方在力捐已貯者可容侵欠仰並移行道府各縣等官速乘收穫之日盡數追還無俾耗隱最難得者熟歲不可待者收藏速速留意共理陳新現奉奏報之旨當不致惠民實心或有隱沒也去後十三年十二月十九日據嶺南兵巡道副使蔡秋卿呈詳內稱廣州府城共長二千七百六十丈濠池除北邊五層樓等處係粵秀山來脉有五百二十五丈不通潮水餘二千二百二十四丈五尺皆通潮水城身高三丈五尺城堞二千七百九十六此廣城之舊制也先已奉檄行府督率南番二縣盡行修整惟北城一派外有越王臺山勢高聳特議加增以杜外伺先據南番二縣會議增高五尺蓋以蔽外敵之窺瞰如是足矣然籌議未悉蒙本部

院檄行覆議又蒙按院親臨覆閱以城垣增高則通城牆路宜槩培高誠爲根本久遠之圖也本道隨會同都司併府縣官親察互商不啻至再茲據該縣議詳北城應增高者南番二縣界內共計四百二十四丈其牆路計濶一丈三尺今於牆路通體俱增高至七尺然後塚牆之增高如之現已集工興作矣其窩舖七十二間則隨勢遍加修築仍築裏牆五尺以杜內之踰越其城樓十有二座今牆高而勢宜相稱亦須酌量改觀其敵臺則於北城一派加增三座又于新城之小南門左五羊門右加增二座籌議已悉當以次而觀成功者若夫積貯及戶積之數據府縣冊報舊積之數本部院平糶倉穀一萬三千二百八十二石零察院永義倉原貯穀四萬七千八百八十八石零續報積贖穀七百八十八石藩司義倉穀九千零三十五石六斗零廣州府永豐倉穀八千七百三十

八石五斗零廣州刑廳廣義倉穀四千二百十六石四斗又南番  
二縣見貯倉穀併穀價共有一萬二百餘石更積新之數除藩司  
鹽海二道另報外本部院見發糶穀四萬石按院現發糶三千石  
該府率同各縣認糶二萬石又有新會大沙田租七千石零現行  
追貯耳若戶積則南番二縣已先報有五千五百石零餘聽次第  
漸積總之三事並圖大司農慮切維桑蒙兩院加惠地方有加無  
已今城工有緒積貯亦裕等因到臣該臣會同巡按廣東監察御  
史柳寅東看得廣州府根本之區枕山阻海東南要會關係固甚  
重矣兵戎銳器籌制已裕惟城穀兩項尙須經紀一則壯百年之  
苞桑一則感中原之荒亂深思遠慮此計臣有見而言也臣聞命  
之日卽檄行估計營建綜理蠲儲隨出臣三年來節約軍需贖錢  
等項發司分糶約畧可得四萬石並督司道州縣共相倡率以行

戶積之法城工初議僅加五尺其制未備檄行覆議間賴按臣按  
部之始加意綜釐親身相度慨然爲善建不拔計道府有司一再  
覆詳殫罄心力于是增北城一帶者高七尺濶倍之又設裏牆以  
杜內之拔越增月城以壯門之擁衛加敵臺以周聲援清馬路以  
便巡警仍竣北工旣竣南工嗣興務使倚山臨海屹然金湯此皆  
按臣指示規畫盡善盡美且奉欽書從事于積儲一項持畫一以  
提衡鼓舞羣工之交勵倡蠲于先台奮于下以及僚辟紳士素封之  
儔翕然認積恐後矣惟是貲費浩鉅茲特經始之日容工竣積成  
再行彙錄上報因奉酌妥速奏之旨謹先合詞入告伏祈敕下該  
部覆覈施行謹題請旨崇禎十四年正月初六日題奉 旨  
請合勦猺寇疏

題爲猺寇出沒發兵勦禦謹據實報聞以祈聖鑒事竊得嶺徭係



樂弧遺種錯居荆楚兩粵之界附近爲連州八排而深山大澤醜類繁滋以萬千計自我朝以來叛服靡常征撫適用崇禎五年四月連州吏目吳中選被殺六年間守備梁陳輔戰殞按臣錢守廉題報并撫臣會疏兵部覆疏奉有這戢猺勦賊事情着該督按相機料理不得輕率啓釁及玩縱滋擾之旨欽此遵行申飭防禦間及臣任事之後四載于茲無大竊發卽有徇偷旋捕旋戢十三年剿平盤古十八峒等賊地方士民欲乘勝兵請勦臣會同南贛撫臣王行南韶兵巡道嶺南分守道會議楚粵合勦間民猺相激于是七八月等日據南韶兵巡道魏士章申稱乳源陽山等縣屢報猺賊出劫合行聲勦等因到部爲炤猺警頻仍且把哨被執據該道稟稱必聲勦始可奪魄近准虔院來咨正行該道酌議則該道與嶺南守道實任其事若欲言勦必東粵韶乳一路清遠一路從

東聯絡並進楚中一路從北廣西一路從西共四路合勦方可收功若布美不定單力不能深入往事可鑒況此中兵勦或出突北楚西粵壑鄰亦有可慮若楚西二省主守廣東二路主勦亦力所不能勢所不便緣此輩久據深山界在三省世世滋種不比流竊犬豕可以易制備牌仰道卽會嶺南分守道並行彼中州縣官確議成畫就便先詳南贛撫院如楚韶合勦虔院主有成議本部院卽一面調兵發餉一面檄行西粵合擊以收共舉之功但廣東就近監軍無如該道長才大畧勝任愉快其猺官黃萬聖蹤跡語言有如該道所言閃爍可疑一面羈候一面差的當員役入連州連山令該州縣確訪詳審報奪以憑施行奉此依經牌行廣州府連陽州縣及南韶守備官嚴督官兵相機堵勦無容蔓延其各賊窟穴連陽地方或勦或撫作何計議可使永無釀患務速酌妥的確

機宜具繇詳報守巡二道以憑轉詳去後崇禎十三年十一月二十八日又據該道詳議猺排始末爲勦爲防措餉增兵設將事宜到部該臣又會同南贛撫臣王廣東按臣柳寅東牌催南韶道僉事魏士章親入連陽監軍督勦間隨看得諸猺以犬羊之類介在楚粵環耳熨足喜人怒獸憑恃萬山出沒三省爲民蠹賊匪一日矣惟無事而文武之守嚴則伏者不敢出有事而誅勦之威立則撫者不敢叛此不易之筴也自崇禎六年撫按報勦奉有不得啓釁縱擾之明綸後來申飭防禦雖時有狗偷迄無大犯縲索之下相安數年近以民猺搏激蠢竊再見十三年秋冬有乳清劫殺之警旋勦旋遁臣隨會同南贛撫臣議動南韶湖湘之旅誅鋤罪醜監軍南韶道魏士章條畫戢守機宜詳明鄭重正在舉行而正月間陽山英德失事之報又續至矣殺傷總練焚掠居民臣立刻發

大兵委都司陳坤入連追討而猺又逃遁楚之熊峒篳籥等處念猺罪已彰不容姑息遂催督該道親赴連陽詰戎振旅責問八排的係何峒猺人聲罪摘勦務俾罪孽伏誅撫守可恃仍鼓用良猺殺賊之勢斷不敢輕縱以畱禍根但目前粵勦則楚遁西奔北竄以流突疲我伏望皇上敕湖廣廣西不分畛域調兵合擊庶四面之圍張三窟之狡塞如十二年間廣西撫臣林報平樂猺警疏中亦有若三省不合之慮況目前臣以重兵西下楚與粵西各摩厲從事亦不致有壑鄰之憂矣至清連守備係臣特請防猺而設者馬文韜任事雖淺職掌謂何失防于先補過于後不足自贖責令降級戴罪圖功守土之責各有司存連州連山逼近猺穴無有失事而陽山縣較遠英德乳源兩縣又較遠反以疎虞被劫則李子章吳永澄蔣明鳳並應罰治若現在勦功並增防永計容臣另疏

具聞伏祈敕部覆議行臣遵奉施行謹題請旨崇禎十四年二月十六日題奉 旨

議陞將增兵防猺疏

題爲連猺屢出爲虐守弁兵寡權輕謹集陞將增兵之議仰祈聖裁事崇禎十四年三月十五日據廣東布政司呈奉臣憲牌據南韶兵巡道呈奉本部院憲牌准南贛撫院王咨前事內開猺賊防勦情形到臣該臣會同巡撫南贛汀韶等處地方都察院右僉都御史王巡按廣東監察御史柳寅東看得猺之在兩廣譬莠生苗中無地無有連陽爲甚以其界錯三省自唐宋以來世世滋種迄今日益繁衍不下二萬餘臣勦疏中已悉之矣惟是勦者分擇首惡用猺攻猺鵬渠魁而戮之所以威也撫者獎誘良善用猺化猺開三面而生之所以恩也而喫緊尤在彈馭嚴備則惡者不敢生

心良者堅于從善此生靈永賴地方公議臣與該道守所苦心而籌也目前大兵行勦臣檄其分別良惡設間用謀一免石玉之焚一散黨羽之勢據該道守詳稱八排中惟軍寮馬箭二排恃衆行劫前此之掠實其罪狀而六排稽顙歸順至欲協攻寮箭以自解免臣念行間用敵宜慎檄之相機審視度可不日奏功另疏題報若陞將添兵之議經司道覆議明確謹先爲皇上陳之連陽錯雜猺中田比閩接在平疇然耳盤踞萬山幾三百里時出爲禍則粵東與粵西湖廣共之歷年各省報疏可考然廣西湖廣各設路將附近彈壓獨粵東以一守備提一千二百食六錢四錢之兵防之是以樊柳而限虎狼非計之得也茲議改守備爲叅將重事權也與湖廣廣西居則三路鼎足戰則互相犄角其勢均矣添新兵一千共舊兵二千二百備戰守也合連陽州縣防則寢厥狡謀勦則

制其死命有餘裕矣又加舊兵食四錢者爲六錢與新兵等差厚  
精責用命也弱者振而強寡者積而衆再合南韶守備之兵歸其  
節制聲勢赫濯卽英乳清韶之間臂指相使西睡可安枕而臥矣  
惟增餉一事臣念國家多事之日不敢動正項銖黍一則取于臣  
所節裁惠州譟兵之餉者五千有奇一則報于道臣魏士章清釐  
三廠之權餘者五千有奇此誰非化無用爲有用奪司廠之囊中  
而歸之公家者乎得此萬餘金則將與兵可不煩他請而立辦將  
西隅之節鎮屹然犬羊望而戢志連陽英乳百萬生靈永免侵掠  
之害矣夫叛而勦勦而撫震動一番亦可一二載無事此臣今日  
之所有事也而兵強則猺詘將重則威伸易戍爲守不戰而安實  
可保百年無事臣總總爲日後慮終不敢以一時易百世也至現  
任新守備馬文韜資任尙淺不堪改授察臣標下旗鼓都司僉書

嚴遵誥雄整精練有過人之才識歷試皆効可資捍圍且勞俸已  
深倘卽用爲叅遊俾補此缺方今有事防勦之日朝推夕任其裨  
于地方非小也因近奉有文武員缺聽督撫鎮遴選具題該部覆  
用之聖諭敢並及之伏祈敕下該部覆議施行謹題請旨崇禎十  
四年三月二十七日題奉 旨

雲隱堂文集卷之十

相州

張鏡心晦臣甫著

子潛編校

奏議十

陳善瓊事宜以收永治疏

兩廣總督臣張 謹題爲海外尙彙歸化謹陳善瓊事宜以收千載永治之休事崇禎十四年三月十七日據廣東布政司呈奉臣案驗准兵部咨職方司案呈奉本部送兵科抄出廣東巡按李雲鴻題前事等因奉聖旨該部看議卽奏欽此欽遵抄出到部送司案呈到部具題云云崇禎十四年八月二十七日奉聖旨社學准先復設備事宜再着張鏡心酌議具奏欽此欽遵抄出到部送司案呈到部備咨前來到臣該臣會同巡按廣東監察御史柳寅東看得瓊州僻在海島州縣環外黎岐踞中跋扈跳梁久爲心腹之

患其水會所則黎馬屎之舊巢也萬曆三十二年間討平其地剏造城郭調官軍戍守爲善後計且設通判以撫馭之立社學以誘化之策畫未嘗不周也迨後通判議裁社學寢廢城垣傾頽所軍蓮脆而亡命奸徒乘虛勾引以致黎獠啓釁臣擒渠治罪別疏具題又經按臣李雲鴻渡海巡歷撫綏慕順之黎解散伏莽之黨一時遐方踴躍隨議設備練兵復學立訓以治教之誠計地方于久安也茲社學已奉俞旨先復而設備事宜行臣酌議臣自接有部檄卽行道府察議咸謂官與兵良不可少只增官增兵則指餉爲急臣反覆倡督立限責成爲墾屯裕需計必俟整理有緒然後敢以入告今則文廟改建矣城垣修復矣公署營房並皆營造已竣而軍兵募補及五百可成一旅矣其舊額軍屯除兌正軍及新募選鋒兵食外且有贏餘以克器藥諸費荒田亦新墾八頃三十畝

歲收租課與清出虛軍田糧可供祭祀廩糧修葺之需不煩動公帑銖黍此皆再四批行府廳親履勘核具報種種實着可以永賴若開講宣化部議委附近州縣訓導亦屬便舉但此地濱海乃瘴癘之土駛舌之人非本處土衿熟習其音者不能以里語相曉譬議以廩生鄭稷勳爲佐訓亦旣廣集黎童誨以小學孝經頗有成效似不妨暫寄師儒之席再俟三年核其誘掖果著題請實授以貢乃廩生應得之物不爲濫也又加銜守備曾顯祖浹歲之間諸事克辦凡建學修城墾荒悉出其手料理井井具見才幹優給現俾督率各營官兵專司防禦仍責以漸次墾闢荒田大裕兵食如後效可觀并題實授與內地練備等一例考成總期暢海外之威靈核耕守事以成我皇上加惠絕島之至意而已再炤是役也除巡道陳以誠計處免敘外前按臣李雲鴻不避瘴波親渡海外妙

綏貳服遠機權建久安長治大策通欲絕之聲教起已廢之版圖  
功在殊俗瓊州府知府蔣一鴻敦大宜民真誠任事擘畫悉中肯  
綦理刑推官羅其綸妙運協贊于先躬履勘核于後並有勞績相  
應敘及仰聽聖裁至其需時而奏實以事詳于謀始行貴其有終  
屯與兵學與城官與弁臣實苦心審度其間待成事而後入告非  
有他也理合具題伏祈敕下該部覆議上請行臣等遵奉施行謹  
題請旨崇禎十四年三月二十七日題奉 旨

保畱方面官員疏

題爲保畱考滿方面官員事崇禎十四年三月初四日據廣東按  
察司呈詳奉臣批據廣東布政司呈詳本司左布政使姜一洪六  
年考滿緣繇批仰按察司覆詳到臣該臣會同南贛撫臣王廣東  
按臣柳寅東考覈得廣東左布政使姜一洪粹守織塵不染閩本

萬應皆宜當軍國多事嶺海凋疲之日歲理百餘萬餉賦輸將足  
額飛輓如期功冠列藩勞深保尹至其端方之範十郡承風慈惠  
之膏四民洽服非德能兼優中和備至安能有斯且俸逾再考宜  
與超擢稱職例應給繇赴部但本官職司左轄通省糧餉經其督  
理勢難離任相應炤例保畱理合具題伏祈敕下吏戶二部再加  
察議合無行令左布政使姜一洪在任接俸管事將行過事蹟造  
冊差人齎繳部院覆覈施行謹題請旨崇禎十四年三月二十七  
日題奉 旨

舉劾防汛將領疏

題爲遵例舉劾防汛將領以昭勸懲事卷察先准兵部咨該本部  
題奉欽依以後督撫等官每遇沿海兩汛完日逐一體訪察炤九  
邊事例于歲終將大小將領分別臧否如有果賢從公議畱如有

不肖據法議斥如其人地不相宜不妨議調等因備咨前來通行  
遵炤在卷今炤崇禎十三年兩汛已畢所有在汛諸臣例應舉劾  
隨牌行廣東布按二司守巡各道開造海防大小將領賢否文冊  
繳報到臣臣再加訪核別其功罪著者爲皇上陳之除已離地方  
及新經任事未見所長者不敢概敘外看得潮漳署總兵鄭芝龍  
識力警拔鷹揚鷲擊能用水犀之旅出入瀚海粵之莽伏波平資  
其彈壓可謂矯矯虎臣掌印都司攝總兵事馬吉翔氣沉識大料  
敵無遺而才鋒揮斥所至劃然壁壘嚴明不愧細柳營惠州叅將  
事副總兵施王政撫士能恩用兵能筭濯濯自矢無脂韋氣代肇  
兵任過非其罪也沉雄之將莫之克先西山叅將趙千駟事肯認  
真法無錯貸其有志建豎者乎抵任後束伍釐奸兵安于律民安  
于堵無復滋寇釀害者矣潮州叅將林宏具敢戰之雄突圍犯難

故遠克二源近弭海警其長也而時露跣跡之氣雷廉叅將吳宣  
猷淵沉有謀靜貞不耀器可遠到以失援同官鐫級今亦功成而  
待報矣筦瘠疲兩汛厥功難遺管虎門叅將事副總兵胡文若才  
畧暇整處新設之地規恢振刷什伍精明虎門無一失事可覘彈  
壓之力管廣州海防叅將事副總兵陸萬里壯貌軒揚才猷老練  
廣海少嘯聚之奸彘醜無跳波之警克任厥職管陽電叅將事副  
總兵歐陽瑞會負忠赤之心饒攻守之策携來親丁皆果銳敢死  
陽電一軍業煥然生色矣裏海叅將鄧光汴官無專署以舟楫爲  
其署該舟十月以來以海上樓櫓爲家而戎務亦次第修飭率此  
行之地方可安枕也兩廣坐營都司僉書盧名成溫文有度雅練  
而詳近攝標營整頓勤敏有用之才也管兩廣旗鼓事都司僉書  
嚴遵誥精神魁岸膽識超雄定亂戢囂功在地方可當劇任未得



以傳宣淹者總兵坐營都司陳坤淵凝劔匣帷燈才氣鷹揚虎視  
勦猺之役慷慨自任而韜鈴夙諳有大樹之風管總兵旗鼓事都  
司僉書郭啓襄具幹辦之才習于廣標士卒安之東山守備陳良  
弼戢盜安民殫厥心力錚錚之弁聽用都司區成勩勞深績著已  
登御覽應分專闈以效馳驅水標守備何兆寧謹慎練勤管水標  
三載士馴器修有功江上嶺南分守道中軍官皮士器齎捧有萬  
里之勞才氣如百煉之鍊但處無事之職爲屈其才耳海北分巡  
道中軍官葉正芳才旣謹飭力亦方剛碣石寨把總黃夢選文雅  
之將東兵帖然無負干城海朗寨把總李時茂才具優贍修繕戢  
弭兩效其績羅定標營把總鄭宇斌氣銳力優近攝恩平一路信  
地無失肇慶衛指揮今授新興練備王綬心計有餘緝獲大盜整  
辦戎事不負練備之選肇慶衛指揮蘇萬邦趨公若渴歷險不避

解鏡一役以後運而得先已蒙部准題補宜登除書聽用都司何  
吾疑才貌恢弘近以解鏡急公并在敘陞之列管造鏡器加銜守  
備陳王英製造火器擅有獨長如三百門解京大炮悉出其手海  
上器藥并屬運給歷薦已多宜與推用標下西前營守備曾華標  
營敢戰之士無山海之役不與有功者具在兵部敘案歷歷可考  
標下西中營把總黎樹績亦勇亦沉可任戰守之用歷案功次備  
載薦剡效用守備胡忠伎諳火攻勞不避險押解援餉督催運鏡  
有功急務赴赴武夫其選也標下東前營把總徐時化才能敏給  
守韶之功人皆多之近勦猺亦克自見清遠衛指揮嚴耀宗年力  
方剛諸事克辦尙中善後之功不可泯選鋒營把總程泰狀貌偉  
然力足扛鼎百夫之特遊奕把總劉莫邦鎮靜寬閒能得士卒之  
心江上資其緝補管理火器聽用把總武得功年刀雄勁赴委如

流擅軍中投石超距之勇下中把總李燦秀撫蚤有功迺任把總之責新會江干桂苻一清矣鎮下哨探把總胡吉偵報詳明才伎雄拔稱空群之選以上各官皆効力邊海地方及有勞績技能堪錄者例並薦舉以備擢用隨材器使者也若不肖之弁在軍政處分後嚴核之得二人焉則委管靖海所潮州衛指揮同知戴爲憲一本官自將遞年軍糧拴同書役許士達管班丘德總旗李福等赴府領出止揀一二刁捍軍人量給籍口餘俱指以壽節爲名剋匿入已旗軍葉沛彭鑑尤耀謚一本官將逃亡事故旗軍遺田四十分每歲可得屯穀七百餘悉入私橐額冊可核佃戶可質一軍人曾大章許用陶茂二名于十三年出汛病故名下屯租本官侵用又軍汛亡故歲有十餘名亦無升合還官案冊可稽一本官包軍八十餘名冒假月糧三四兩不等三年計得銀一千餘兩差腹

役危一成劉俊黃銘盧大茂蔡文詹興典許旺票催可審一該所徭匠軍十名該輸修城銀四年共七十二兩本官具領行糧已經扣足止解過銀十兩尙銀六十二兩侵漁入已縣催藉口拖欠該所徭軍可審一本官徵收本港漁船大者四十隻每隻銀二兩四錢小者二十七隻每隻銀一兩二錢又鋪店屠戶二十八家每戶徵銀八錢名爲軍需共銀一百六十兩有奇儘克汛防慶賀雜項之費又于此外復科每軍一名銀四錢五分飽壑衆軍可質一所軍十年輪換年約補軍二十名本官每名勒公堂使費富者十兩八兩貧者五兩四兩不等補替各軍可詢又廣海寨守備曹師和一本弁結軍沈秉性爲腹心書辦陸璞管班黃祖爲鷹犬衙蠹張振雄旗手陳德高太張子龍陳功爲牙爪衆兵團呈證一本弁將病退在逃虛兵李勝何秀蔣祿等一概不報每月冒餉入已庫冊

并隊兵梁勝等證一本弁乘把總譚昌言到任違限不准申報勒詐銀三十兩入已方與申報譚昌言證一本弁藉颶風為名捏報蘇奇周貴二船飄溺私將船隻軍器差兵駕往江門埠發賣被中軍施以靜獲證一本弁將破船隊兵食糧半扣入已船兵麥英盧萬勝證一本弁賒取米舖梁真用等米石不給價值致真用告批防廳陷左國良等二十餘人傾家本人證一本弁賒取舖行羅鳳宇歐亞二等布疋銅錫等物不給價值本行證一本弁督官舍黃元極吹手陳萬妻蔣氏昏暮捉搶捕盜周貴受聘室女為妾人人切齒周貴證此二官者剝軍侵糧穢聲昭著大失兵心有玷海政所當從重革任革職究擬者也又准兵部咨廣東解銳指揮蘇萬邦跋涉勞似難泯候解銳二運報到題敘外咨回銷籌候缺題補等因又據嶺南分守道中軍守備皮士器呈稱蒙推今任兵役衙

俸毫無所有齎俸萬里赤貧罔告願甘回衛等情雷廉路中軍守備趙廷樞呈稱萬里馳任賃居倩役無事傳宣無兵可管餬口無資祈題回部改推等情在案再炤蘇萬邦委應題補因無現缺又粵在萬里外徃徃題補未到原缺已推至皮士器趙廷樞兩官才力表表堪任兵役但以守道原非轄兵路將多無中軍以致窮困遐方進退維谷近添選叅將中軍及各寨營把總十五名或無原設廩俸或僅管兵三百至歌彈缺而歎旅羈臣念額官半裁廩給增員何賴不得已從曠餉設處半給至不能餬口蓋本省尙可惜資若地遠則貲費益窘耳伏祈敕部酌議凡中軍備把小缺憫其遠任之艱准于就近廣省原籍武官中如應補之蘇萬邦區成勳及十餘薦之陳王英曾華黎樹績等炤缺出題補則未弁從輕熟効職而無遠任艱辛之顧敢因舉劾汎弁而並及之伏祈敕下該

部察議如果臣言不謬將鄭芝龍等紀錄擢用戴爲憲等從重議處蘇萬邦等隨缺出補用庶懲勸嚴明而海防有裨矣謹題請旨  
崇禎十四年三月二十二日題奉 旨

恭承新命酌議封貯印牌出境疏

奏爲微臣恭承新命催任謹會同按臣酌議封貯印牌出境具聞以所聖鑒事臣鏡心庸愚劣弱待罪粵疆四載去冬十二月間因勞嗽之久積染濕瘴形體枯萎心氣怔忡立則眩暈食則脹嘔日甚一日醫藥罔效遂不能蒞堂視事杜門臥病一切緊急公移從牀褥料理已近四月自謂生還無期忽于本年三月初一日准吏部咨爲缺官事奉聖旨是張鏡心陞兵部添設左侍郎仍帶住俸戴罪欽此移咨到臣臣欽遵力疾叩頭謝恩自幸萬里病臣積有愆蓋忽蒙聖鑒捷臣左樞真不世隆恩出臣夢想之外隨于初五

日准吏部咨奉有馬上星催赴任之旨臣一面兩次差人移促新督臣沈蚤行受事念臣衙門印務未奉明旨交何人署理不敢私相授接而境內差安雖有勦獠之役徭役漸次順伏南韶道僉事魏士章足以辦之具臣陞將增兵疏中況按臣柳寅東持法振紀凡軍務所在指示擘畫動中機宜十倍于臣臣所信服因按臣東巡潮惠臣不得不候其邁返相與議定封貯印牌赴皇上星催赴任之旨約略四月末旬按臣定抵廣州新督臣急公赴命之殷亦必不日受事臣雖病危垂斃不敢不輿疾北行也第自三月初五以後京報中斷臣之齋奏往往被劫又不知臣疏何日上達謹具疏奏聞伏祈聖鑒謹具奏聞伏候敕旨崇禎十四年三月二十日題奉 旨

蕩平尙寇善後事宜疏

崇禎十四年三月二十日

題爲尙寇流毒日慘勦戢事不容緩謹先據實報聞仰祈聖鑒事  
崇禎十三年七月初十日據廣東嶺南兵巡道副使蔡秋卿呈奉  
本部院憲牌准兵部咨兵科抄出兩廣總督張 題前事等因崇  
禎十三年閏正月二十二日奉聖旨據奏尙寇出沒劫掠着該督  
鎮按嚴督道將等官上緊殲掃勦逆撫順以靖地方不得稍有疎  
縱致蔓延流毒自干罪戾該部知道欽此欽遵密抄到部備咨前  
來案察前事先該本部院具疏會題去後隨卽檄行監軍道及總  
兵官督發四路官兵將十八尙寇勦撫蕩平又經敘疏題報及行  
酌議善後外今准前因會牌仰道卽便一體欽遵確議詳報該道  
隨將安插撫民緩戢餘孽丈田定賦伐木通道與建治設官立營  
置堡等項條列詳報以憑覆核會題施行等因到臣該臣會同巡  
按廣東監察御史柳寅東看得盤古諸尙寇界在番清從之交雖

山澤深險非有邊僻之遼也乃阻梗聲化荼毒民生自國初迄于  
今靡有寧宇良繇土田無姓不逞者負之而趨人跡罕經逋逃者  
走險之挺以至蔓引苞深不可收拾臣等幸奉皇上嚴諭遣將誓  
師掃清窟穴數月之間民始安枕已經奏聞惟是苟且之規不可  
以終日姑息之政必至于養奸況奉旨下部咨臣善後仰見廟謨  
宏遠臣卽愚昧何敢避厥勞怨不圖一勞永逸爲地方計久長者  
故田不闢民不可得而聚法不均田不可得而闢于是委通判黃  
中澹偕同三縣履畝清核再委廣州南雄二府推官牟賢黃廷才  
覆加勘丈其外之軍屯竊據還之軍內之民田有無租主斟酌糧  
價授之民實按無主之田番禺以八千四百六十七畝計清遠以  
五千三百九十畝計從化以一百二十一畝計共陞糧以三百一  
十三石五斗有奇計共認價以一萬六千八十二兩計各尙山木

共估值以四千六百七十七兩計務在菁柞悉開土疇分易第肥瘠之差杜侵併之害而經始之日賦取其輕法主于寬輕則趨多寬則佃易俄頃之下可成邑聚則地墾民稠盜賊不屏而息此其善後者一崗分三縣人各爲心潢池之剪誰適爲主不移一官以治之一柄交委鞭長難控野火復燎前功敗地于是議復新裁廣州府捕盜通判一員于水西適中建署專理使弱肉強食藏山嘯澤之奸有所憚而不發且官非創增事無大費以本府之捕官移本府之要害計孰便焉此其善後者二崗山紆迴三百里鳥道羊腸生成天險其最峭隘無如盤古葛埔婆雷西坑等數十堡其最扼要無如三垸田一地無弁以制兵無兵以防寇田者不得安其耕官者不得施其治雖旦夕之偷安終狗鼠之竊據于是議調軍兵七百名分屯各隘據道詳清遠衛指揮嚴耀宗安靜勤慎與地

相宜或加守備職銜任用或別選賢能推補爲之起建營署于三垸田處所專司防戍則于城永壯卽草昧中伺隙觀釁之戎可以潛伐此其善後者三以上事宜經臣會同按臣履行道府廳縣悉心綜核從長計議仰副皇上除寇安民至意若潮州府通判黃中澹廣州府推官牟賢南雄府推官黃廷才身親經紀者數月宿霧飡風諏地協謀厥勞難泯應附前案功次彙敘至營建文武二署約略二千金可用底績取之木價中不煩公帑銖黍也臣敢更有請者崗田辦價除營署二千兩外尙餘一萬八千七百六十兩有奇自應還之朝廷或念嶺海新奉儲備功令臣等感念中原兵荒饑民死徙皆因儲特不早以有今日容臣等糴穀數萬石另起倉廩專貯備賑爲三年六年計則地方仰賴皇仁愈昭曠蕩矣敢因善後而并及之伏祈敕部覆議施行地方幸甚謹題請旨崇禎十

四年四月初十日題奉 旨

辛巳 先君晉秩北少司馬有舉薦兩粵方面有司將領三疏甲申經亂失稿海內諸君子如有舊藏郵抄錄寄補刻感且不朽

懇辭加陞疏

潘謹識

兵部添設左侍郎臣張 奏為海蒙聖恩恭瀝謝忱懇辭加陞以安愚分事臣某自崇禎十年四月內被命出督兩廣絲毫靡效蒙皇上矜念陞臣今職感激就道隕越于風波艱危之中出入于兵火流離之地在宿州永城夏邑間為袁寇等所阻格不能前進賴臣鄉撫臣高名衡兩次發兵勦開臣因紆道北行凡四月餘得次近郊接兵部咨為四省會勦覆覈彙敘事于本年五月內奉有張某陞一級仍賞銀二十兩紵絲二表裏之旨欽此又于八月內題為海外尙藝歸化等事奉有張某行吏部紀錄仍賞銀二十兩之

旨九月內題為路將夜擊珠賊等事奉有張某賞銀二十兩之旨欽此聞命白天措躬無地伏念臣待罪粵疆首尾五載自維無一善狀而藪澤之氛在在可虞使能消弭未然山海清宴何功可言迺楚寇被于隣封海藝越在遐島至尋甲兵兼煩縲約幸臻底定總屬因人愧補救之後時何涓塵之可述猥蒙天恩鄭重屢沛溫綸金弊輝煌重頒御澤臣謹叩頭祇領仰謝鴻慈惟加陞一事係二秩崇階非可濫及臣有何功敢膺茲賞衷實徬徨理難冒昧伏祈皇上鑒臣慚慄愚誠匪繇矯飾容臣辭免加陞以今銜回部辦事庶慎非分之榮釋逾涯之思在皇仁為已優而微臣犬馬一念少獲卽安矣崇禎十四年九月二十九日奉 旨加陞已有成命張鏡心着遵旨祇受不必遜辭該部知道

謹束身恭聽考覈疏

題爲微臣給繇未經部覆新任周敢受事謹束身恭聽考覈事臣  
叨督兩廣自崇禎十年十月二十八日到任起扣至十三年九月  
二十八日止連閏實歷俸三年例應給繇恭于十三年十月初三  
日具疏上請因兵火格途至十一月二十四日奉旨下部維時臣  
因會勦楚寇戴罪未經湔除隨于十四年三月初六日兵部一本  
爲咨明戴罪緣繇事奉聖旨張鏡心着免戴罪欽此又五月內兵  
部一本爲四省會勦覆覈彙敘事奉有張鏡心陞一級仍賞銀二  
十兩紵絲二表裏之旨欽此臣一面具疏恭謝辭免外伏念三載  
給繇迺朝廷黜陟大典攸關況臣待罪兩粵黜謫無狀分宜禡斥  
雖聖恩優容與以免罪敘錄然部覆一日未行是臣一日斥留未  
定之身也揆之典制罔敢冒昧回部除束身恭聽聖裁外謹先具  
疏奏明臣無任悚慄待命之至崇禎十四年九月二十九日奉

旨該部知道

吏部覆考覈疏附

吏部覆看得兩粵年來海氛出沒不常彞崗交証肆毒若日南  
之互攻東西滋擾按山之竊發村邑屢傷總督之任亦綦難矣  
督臣張某才可擊電鞭霆度可和風甘雨當四省會勦已預發  
縱指示之籌值兩廣多艱克展底定廓清之畧以故泯解難夷  
瘴消波息重鎮久資彈壓中樞亟藉贊襄今本官以考覈一日  
未行斥留一日未定具疏上請第旣已回部相應到任管事炤  
在京堂上官例于該部行咨臣部另行定日引奏恭候命下遵  
奉施行崇禎十四年十月初九日奉 旨是

請補給考滿誥命疏

奏爲蒙恩復職請給誥命事臣于崇禎十四年十一月初一日准



史部咨爲給繇事該本部奏考功清吏司案呈奉本部送准兵部  
咨送本部添設左侍郎署右侍郎事加從二品服俸張某歷正三  
品俸三年考滿給繇到部送司案呈到部焯得本官歷正三品俸  
三年考滿緣係在堂上官員例不考覈應否復職取自上裁等因  
具奏崇禎十四年十月三十日奉聖旨着復職欽此欽遵移咨到  
臣臣聞命自天感激無地一面報各謝恩竊焯臣一介菲才叨任  
三品已逾四載因回部給繇猥蒙聖恩不加擯斥准與復職例應  
給三代誥命緣臣父母及祖父母恭遇崇禎十二年恩詔已邀正  
三品誥命至臣與臣妻應得誥命遵例移贈臣生祖父母俱于崇  
禎十三年二月內頒領茲蒙恩考滿復職除臣父母與臣祖父母  
例不重給外臣與臣妻應得誥命伏祈敕部察給以彰聖恩臣不  
勝感激奉 旨吏部知道

吏部覆補給考滿誥命疏附

吏部覆察得兵部左侍郎臣張某制兩粵之二年恭遇聖母皇  
太后尊崇謚號覃恩贈祖父母封父母正三品誥命又蒙恩俞  
移本身及妻誥命贈生祖父母業于崇禎十三年二月內恭領  
此三載給繇吏部再以考滿例請給應得本身與妻封典曰是  
會典未載者益移贈間爲逮下之深仁課績自有疏榮之彞典  
特事非恒見條例未詳但本官勞績之奏已蒙帝鑒似非所靳  
況當修明典章之日仍宜增入此條永著爲例則教孝作忠道  
大備矣等因崇禎十四年十一月十一日封進越數日上傳吏  
部察有侍郎或巡撫三年考滿願將本身及妻應得誥命移贈  
生祖父母奉旨允行如又遇六九年考滿本身及妻誥命應否  
再給將此例察一二起來係何年月日奉旨寫明白來吏部回

奏無例越數日上又令文書房察出覃恩移贈移封四五六七品官共七起令吏部察會否考滿再給吏部回奏俱無至十二月十一日忽奉 旨准給與會典增入此條依議該部知道

吏部請給恩廕疏附

吏部題爲給繇事驗封清吏司案呈奉本部送准兵部添設左侍郎張某咨稱炤得本職三品考滿已奉聖旨着復職欽此察得吏部職掌一款正德八年吏部題准今後三品以上京堂官三年考滿已經請給誥命者吏部卽與察取應廕一子題准咨送禮部轉送國子監讀書免其自行陳乞今本職已蒙復職與例相符所有應廕兒男各歲相應咨送今炤嫡男張沅年二十六歲係磁州儒學廩膳生員序應承受前廕等因到部送司案察先准考功清吏司付開兵部添設左侍郎署右侍郎事如從

二品服俸張某歷正三品俸三年考滿給繇復職緣繇在案又察得正德八年十二月內該本部題今後三品以上京堂官考滿已經請給誥命本部卽與察取應廕一子題准咨送禮部轉送國子監讀書免其自行陳乞等因節奉武宗皇帝聖旨是欽此欽遵今准前因通察案呈到部看得兵部添設左侍郎張某歷正三品俸三年考滿所有廕子一節既經咨送應廕兒男各歲前來相應坐各題請合候命下將生員張沅准承前廕咨送禮部轉送國子監讀書但恩典出自朝廷臣等未敢擅便伏惟聖裁緣係給繇事理謹題請旨崇禎十四年十二月二十六日奉 旨張沅着送國子監讀書

代河北災民祈免疏

河南彰德府磁州武安縣衛輝府淇縣災民趙鑑等謹奏爲災黎

苦中之苦懇祈聖明仁外之仁亟賜蠲免以存子遺事臣等河北地方自十一二三四等年累歲奇荒非早即蝗山焦水竭草死木枯面鳩形鶉食與獸等倫理相殘瘟疫大作死徙靡依盜賊蜂起盤踞臣磁武馬鞍山等寨及淇縣附近百泉山等寨搶掠焚燬瀾天漫地如屠如掃幸荷聖明遣保督楊文岳鎮臣虎大威大兵撲滅于十四年之春誅殺無算原野爲空寇黨雖鋤人煙亦絕目今臣等三州縣有地無人無耕即去冬今正畧有雪澤究竟亦荒榛茂莽錢糧出自何地敲比加于何人止靠城中鄉紳素封之家替賠一二三臣等村市遺黎思想趨農布種望見官府催科之令誰敢出頭春作既空秋收何望哀哀下情何繇上達且河北荒寇疫癘極災情形現今撫按檄下道府一察再察報疏覆咨達皇上御前不止一次豈是臣等有可奈何而敢煩瀆者乎臣等居近上

畿傳聞聖慈垂念國本繫免十一二年逋欠又免河南四府十三年四年逋欠浩蕩洪恩如天地日月無不臨炤豈獨遺臣等向隅之情若以中州八府論之河南誠苦若以河北三府論之淇磁武臨林爲苦再以五州縣論之天災賊禍磁武淇又爲最苦往來官員經繇耳聞目擊千真萬真嗟嗟一州縣錢糧在河北三府不當百分之一三州縣災患在河北三府實有萬分之甚懇祈皇上帝開惻隱俯念河北苦中之苦萬不能支特救該部察三州縣災寇極重情形炤撫按屢次核確疏咨將十三年一切起存錢糧關津米豆除大小鄉紳炤舊全完外凡係窮民拖欠槩行蠲免以救水火以存餘息庶臣等猶及見天日爲盛世再生之民一字一血冒死叩闕伏祈天鑒睿察施行爲此具本親齎謹具奏知戶部一本爲災黎苦中之苦等事覆趙鑑等奉 旨據奏磁武淇三州縣被

災極慘深屬可矜其所畱七分錢糧准再豁免以甦窮困他不得  
援以爲例

懇辭薊督崇銜疏

兵部左侍郎臣張 奏爲微臣謬叨重簡崇銜萬不克承謹瀝血  
控辭以明臣心事臣接邸抄見吏部一本爲欽奉聖諭事奉聖旨  
張某陞兵部尙書兼都察院右副都御史總督薊關通津等處軍  
務兼理糧餉經畧禦敵寫救與他着卽速到任料理不得少稽欽  
此臣一介書生不習軍旅備負佐樞處非其據昔鎮撫嶺南幸邀  
國家景福率屬察吏弭盜安民斤斤補救僅得無事原未經歷邊  
塞有所表見臣又性情所率不善機權若授以三協兵事其爲殞  
越不問可知卽冢樞舉臣或憑資次而臣之自知與人之視臣共  
知其不任也薊門何地尙書何官臣若冒昧任承他日敗壞封疆

身不足惜如國事何烽火逼關臨敵易將又易以不習三協之人  
恐非所宜且臣體重痰壅夙有嗽喘之疾兩與召對之班須臾出  
嘔不止一次緣在門外或皇上不見而輔臣見之甚真非同矯飾  
伏祈皇上念薊門係神京安危豈容一擲或別簡能臣以慎重寄  
或仍臣原職無辱崇銜庶成臣自知之明重國家非常之寄臣可  
任待命之至崇禎十五年三月二十二日奉 旨卿以壯猷夙抱  
簡任薊督着遵旨作速赴任料理不允辭該部知道

請補薊鎮將兵疏

總督薊遼兵部尙書兼都察院右副都御史臣張 奏爲召對未  
盡機宜謹遵旨補牘具奏事臣以菲才叨簡薊督自顧不任魂夢  
皆驚猥蒙聖恩賜金綺等捧謝之下愈深凜慄至薊督舊額之兵  
征調一空新創之兵從頭作起又苦銀餉之不湊手新募之難驟

用也蒙皇上慨允發帑三萬兩仍命臣會同計樞二臣議定具奏  
謹于二十四日在朝房公同戶部尙書傅兵部尙書陳酌商妥當  
在餉則戶部現發二十萬兩解運軍前在兵則東協抽三千中協  
抽一千五百西協抽一千五百天津通州各抽二千俱調至臣薊  
鎮左右近地付臣標總兵官練之並新募之四千及未任督臣張  
福臻帶來陽和之二千共計之可得一萬六千名若新募則應二  
萬四千名容臣選官分投委募如是則合關外總兵白廣恩之五  
千可足舊額矣但臣標選募方新無總兵官誰職其事視三協有  
現兵者不同因共樞臣議調西協總兵官唐通歸臣標下西協員  
缺亦卽就三協副總兵內揀補庶可朝命下而夕到任得借手以  
從事矣至戰兵需馬並乞皇上立發數萬金臣委官于市口挑買  
皆刻不容緩者也臣可任待命之至崇禎十五年三月二十七日

奉 旨已有諭旨了該部知道

請補薊州各道疏

奏爲請補監軍道臣以速選募事臣叨督薊之命事事從無作有  
卽舊有監軍三員今皆無有也臣不得不據聞見所得堪任邊事  
者一爲請補而奏現任薊州兵巡道朱國翰仁恪之品宜腹不宜  
邊擬用原任延綬叅議今降三級調用張亮補國翰缺而國翰聽  
吏部另行推用又擬調陽和監軍道張斗補薊州督標監軍綠未  
任督臣現帶陽和兵二千已駐薊門仍以原監軍張斗統舊募新  
斯爲兩得又擬起用原任密雲兵備道今擬配馮師孔爲薊州督  
標監軍道輔臣謝陞亦稱其才委可用以上三臣與樞臣會議僉  
同想皇上不靳破格以應急需也至監紀各官容臣任後題補伏  
祈敕下吏部速行推補崇禎十五年三月二十七日奉 旨已有

諭旨了該部知道

吏部遵諭移咨疏附

吏部題爲欽奉敕諭事文選清吏司案呈崇禎十五年三月二十五日寅時奉部送恭奉敕諭論吏兵二部前日部科面奏勸督旦夕需人恐張福臻未必卽到因舉用張鏡心今聞福臻已到且昨日鏡心召對奏稱福臻前帶陽和標兵二千見在駐劄增防若欲兵將相習似屬原督統馭乃更相宜福臻可仍督勸兵部馬上差人催他星速到任其鏡心着另議別用吏部補本來行特諭欽此欽遵恭俸到部送司案呈到部謹遵敕諭將張福臻仍舊督勸移咨兵部馬上差人催令星速到任其張鏡心遵旨另議別用恭候命下臣部遵奉施行

懇辭陞賚疏

奏爲恭辭陞賚以安愚分事臣書生硜鄙承乏佐樞日夕冰兢常懷隕越不意督勸之命循次及臣猥蒙皇上晉臣尙書秩銜面賜銀四十兩彩緞四表裏欽此圖報有心措躬無地除疏辭面謝外已擬晨刻束裝就道忽接吏部送聖諭論吏兵二部前日兵科面奏勸督旦夕需人恐張福臻未必卽到因舉用張鏡心今聞福臻已到且昨日鏡心召對奏稱福臻前帶陽和標兵二千見在駐劄增防若欲兵將相習似屬原督統馭乃更相宜福臻可仍督勸兵部馬上差人催他星速到任其鏡心着另議別用吏部補本來行特諭欽此臣不勝惶悚伏念皇上用人因時惟求速任以責成功臣既不獲往效馳驅則二秩崇階豈容覩受况焜耀綺金頒自御府無功之酌胡顏以承伏祈皇上鑒臣下情准辭免崇階封還厚賚庶天恩不致濫被而犬馬得以自安矣崇禎十五年四月十四

日奉 旨覽奏辭知道了該衙門知道本內述旨落一字着添補行

請假送親疏

兵部左侍郎陞總督薊遼兵部尚書留部管事臣張 奏爲微臣烏私萬苦謹遵送親典例仰懇天恩允假以彰孝治事臣聞人身親生之君成之臣通籍事君二十一載未嘗侍親一日孝經所謂悖德禮也況臣父母俱八十以上皤然望九值臣督粵五年離家萬里子思親而毛血盡枯親思子則衰殘弥甚從瘴癘歸來聚首痛泣恍如隔世烏烏有情誰能再割遂製臥輿扶親來京日僅半程勞則心悸今年元旦臣母不能起床臣從床下拜伏痛裂五中自是母目朦迷語言顛囈如在夢寐無非以倦倦歸家爲念若朝不及夕也正擬瀝情入告忽聞薊督之命斯時明綸嚴重面奏之

下臣不敢引例送親曾蒙天語褒嘉而臣父母之神氣愈加楚痛驚惶至廢寢食矣今蒙新命臣不果行割裾之痛殷殷在心故鄉之悲悠悠弥駕此日在京並無親男弟侄代臣將奉臣不以此情實控皇上高高之天何辭下炤正恐風燭衰齡淹鬱異地必至以臣之身誤臣之親所謂有子不如無不孝又何忠矣察得大明會典一款嘉靖十三年題准京官有老親隨任奏送還鄉者量地方遠近定限俱作缺煌煌典制臣實相符且臣籍磁州緊鄰畿輔千里之外往返非遙察近日昌平治臣劉餘祐關薊督臣張福臻請假省親俱蒙恩允仰見皇上體臣之思孝治之典並行兼被而臣又議用之官與二臣見任督治者不同當不靳恩于微臣也伏祈天恩敕部炤會典定限作缺臣與臣父母感高厚于無極矣至陞資雖有成命誼難卽安已經具疏上辭因未奉旨再祈明諭俾臣

遵奉臣無任恭顙待命之至崇禎十五年四月二十三日奉 旨  
覽奏自屬至情張鏡心准暫假送親前來供職吏部知道

告病疏

奏爲微臣夙疾感發勢難供職懇祈天恩放歸調理以延餘息事  
臣體氣重濁夙有痰症兼以五年瘡癘之區濕熱薰蒸血液耗損  
顛毛幾盡鬚鬢如霜邪火內攻愛氣時作而咳嗽之聲咽嗑不利  
咯之不出嚥之不下痰如破絮鬱積傾瀉坐臥之處無有乾地自  
臣入都後臣同官時時見之頃以請假送親候旨間忽動怔神徹  
夜不昧噫氣吞酸或痛或噦喉中漉漉痰結喘急于十三日晚刻  
連嗽連嘔吐血升餘昏迷不醒者久之哮吼之後遂成呃逆延醫  
紀綱觀診視謂臣痰邪久積濕熱在脾勞役之過兼以憂思火炎  
血沸嘔喘並厲若不靜攝立成翻胃之症急投湯餌日一再服而

眩暈如故喘急如故念臣年逾五旬血氣衰減薪勞朽至福過災  
生歎職業之勉循卽狗馬有心痛性命之垂危願結啣異世伏祈  
天恩放斥回籍調理倘一綫餘生不卽填溝壑當與雙親世世祝  
聖壽於無疆矣臣可任悚息待命之至崇禎十五年四月二十五  
日奉 旨張鏡心已有旨了該部知道

准假謝恩疏

奏爲蒙天鑒烏私准假送親謹力疾謝恩事臣一介迂儒三朝參  
養仕逾廿載效靡寸長出扶衰白之親歸切晨昏之侍謹抒來諭  
敢曰違將雖臣情之良殷懇天聽之尙遠耻深鉗罄病集瘵官爰  
日夜以忡怔致嗽痰之沸湧再陳病狀仰瀆宸聰詎候命之晨忽  
蒙恩之日捧讀聖旨覽奏自屬至情張鏡心准暫假送親前來供  
職吏部知道欽此臣軀微恩重感盍涕零帶病支床扶親叩首念



弘仁錫類廣孝作忠在皇上以體臣者體親真靡遺之覆載在微臣以報親者報主愧有限之捐糜從此視息之年盡是結啣之日謹具本恭謝力疾辭朝再炤臣引會典送親一款內原有量地方遠近定限作缺之例目今樞佐職掌難曠並祈敕部炤覆作缺臣一面輿病送親途次候旨臣不勝感激惶悚之至崇禎十五年五月初三日奉 旨覽奏謝知道了該部知道

請休致疏

奏為臣病殆不可為申籲天恩俯容休致事臣比來無歲不病衰乃益甚益緣氣體癡重筋肉弛緩痰多精少喘急氣壅中弱之人水火陰陽有感必劇臣體可易臣病可愈也故待罪禮垣三疏祈疾典勲督粵累有籲原癸酉三月厥于朝房同官目擊篤病嶺外幾殞瘴鄉疏在御前匪敢飾說今年蒙恩送親病中踴躍驅車就

道勉任衣履不意抵家旬日忽感寒症不食不語者數日延醫生王倫全診視相對茫然迄今刀圭所畱止餘殘息血焦中乾痰邪大作啜不半甌臥不交睫耳病暴閉兼之血沸暴下不可復止于是輾轉需人步趨盡失臣父母撫臣太息謂命厄之人仕亦蹇疾歸亦顛頓臣從昏瞶中仰憂雙白俯喘微生旦夕不周必至兩誤況暫假嚴綸瞻想隕越此臣所以欷歔感歎而不能已于泣陳也夫病人所忌臣豈樂言仕人所榮臣豈甘退良以望六之年血氣衰失痰症三犯豈有生理臣又偶借邸抄察臣謝恩諸疏有無奉旨見臺臣王孫蕃疏言薊督及臣念臣之用非繇廷臣會推臣之易實繇舊督適至事理顯白無所復贅即援例送親一疏久已脫稿因右侍郎未任佐樞無人故爾遲遲臣同官及在廷多有知之惟謂臣以可有可無之才為可急可緩之用此則知臣之深者雖

雲隱堂文集卷之十  
臣自訟無以易此臣疏以病告偶見抄牘因并及之伏祈皇上憐  
臣親老身病犬馬情真賜臣休致萬一調理之餘尙存餘息臣與  
臣親永永祝聖壽于無疆矣崇禎十五年六月二十二日奉 旨  
時艱需材幹辦張鏡心着假滿前來供職不得以病引請該部知  
道

再請休致疏

奏爲臣病日益沉篤萬難供職懇恩罷致以存幃蓋事臣數奇命  
薄瘵痼纏綿望九之親相依爲命蒙欽假侍歸病復日劇揆之臣  
年卽彫殘萎死無足多惜而獨以仰負君命爲患六月中力疾拜  
疏籲天祈斥不意從邸報中接有時艱需材幹辦張某着假滿前  
來供職不得以病引請之旨欽此臣不勝感愧不勝戰慄伏枕叩  
頭謝恩竊念臣生際聖明恩蒙畜使若尙有可起之病可致之身

當熙明之世誰甘自外惟是痰邪大熾左體漸痿向之哮吼者今  
已至于翻胃向之麻木者今竟至于不仁目光短盡心血枯盡精  
神恍惚輾轉床簀已三月餘步趨盡失手腕不靈臣鄉兵荒死徙  
無藥無醫卽就醫于外市藥于遠而醫亦不起藥亦罔功自顧餘  
生僅存且暮仰念高深揮淚欲絕而力不赴心則臣之命矣察得  
原任詹事府詹事仍管國子監祭酒南居仁都察院左都御史王  
道直先後以病陳祈俱蒙恩允臣才不逮二臣遠甚而病又過之  
例實相同伏望皇上憐臣犬馬情真危在朝露敕部覈臣生平無  
大罪戾准與炤例休致臣卽溘死溝壑以得正首丘沐幃蓋之恩  
於無窮矣崇禎十五年十月初八日奉 旨張鏡心已有屢旨着  
卽祇遵前來不必連章引請該部知道

懇辭加俸疏

奏爲恭謝天恩兼辭加俸以明勿欺事臣病曠中接邸報見兵部一本脩察前後擒斬事奉有張鏡心劉餘祐各加俸一級之旨工部一本奉行設備事奉有張鏡心賞銀三十兩之旨欽此臣惶悚欲絕雖懋賞誦庸從疑爲重計功受賜在素爲譏況朝廷大典彰往勸來豈容冒昧肇鎮城工厥有專司賢令蕭琦以絕塵之守節措不貲善建之才經營不朽臣無其功僅與其事至山東俘捷于臣靡涉緣兵部左侍郎設有關防耑職凡兵戎調度全不與聞官非當事前何所彰病不在職後何所勸況臣原官三品加俸二級再加一級所叨何階寧堪僭濫謹叩頭祇領賜金鳴謝外所有加俸一級俯容辭免伏惟聖鑒臣無任瀝誠愧悚之至崇禎十五年十月二十一日奉 旨知道了加俸已有成命不准辭該部知道

請母卹典疏

兵部左侍郎陞總督薊遼兵部尙書雷部管事丁憂臣張 奏爲微臣痛深罔極泣血陳情仰懇天恩炤例給卹以光泉壤事臣惟致身之義篤于顯揚卹下之仁存乎風勵故誦蓼莪則懷親德捧來諭永錫諸篇則又歎君恩之重而感激涕橫也臣母累封淑人許氏去年八十有二同寓京邸風燭之思凜于斯夕恭具援例送親一疏猥蒙隆恩曠典予假侍歸比至家而衰乃愈甚凡臣前後瀝陳字字血誠并無托飾無何于九月二十九日溘然見背臣悲迷殞絕于土草之中者數月不復自意尙雷視息伏念臣入仕時臣母已六十一歲東西南北不遑定省者二十一載違親悠忽嚴此承年向微聖恩臣其天之僂民臣之所大痛也臣母家訓甚嚴自臣起家縣令歷任瑣垣以及五年督粵雖數千里外時時貽書教臣清白勗臣盡瘁又以三命益共之訓誠臣臣小心謹慎洊瀝

中外可幸奉命不致隕越秋毫皆臣母之賜自慚蒿棘莫報劬勞  
此又臣之所大痛也臣安敢不收淚陳情以臣母應得卹典哀鳴  
于皇上之前察得大明會典並卹典條例內凡兩京三品官並父  
母曾授本等封者俱炤例祭墓又一款三品父母曾授本等封者  
無論亡故先後一視其子以爲差等其已經考滿者祭墓全給而  
未經考滿者雖曾授本等封與祭一壇減半造墓今臣母已覃恩  
叨受正三品誥命臣以督學實歷正三品俸三年奉旨考滿在案  
臣母今日正與考滿祭墓全給之例符合伏祈皇上曲體哀矜弘  
敷孝治敕下該部炤例察覆俯賜應得祭墓臣母九原可作應圖  
啣結臣亦借以少贖遺親之罪報育我之恩倘此身一息少存當  
銘刻皇恩永矢捐糜于勿替矣崇禎十六年七月初四日上十一  
月二十九日奉 旨該部察例具覆

請父卹典疏

奏爲微臣續丁父憂痛陳血忱恭祈天恩炤例給卹以隆孝治事  
臣自去年送母歸里旋丁母艱痛違親之久得依土草躬操畚鍤  
負築荒坵頂戴聖恩一思一泣不意辜孽重多殃禍踵至今年十  
一月二十六日臣父仁聲復溘然見背逾年之外怙恃雙摧號痛  
昏迷一夕數絕斃斃天之鮮民生不如死也親年不待愈覺遺親  
之罪深罔極難酌方嘆錫類之恩大臣父繇歲貢任四川樂至縣  
知縣奢亂之後民散賦逋臣父單車赴任潔已愛民嘔心剔蠹撫  
循三載流移盡復邑賦如初樂至之人感爲再造後以遠任失調  
題明致仕而家食奉公里居嬰壘捐貲繕堞出穀廩饑善匪近名  
施不求敘至其皓首窮經教臣登第臣筮官縣令洊歷瑣垣出任  
遐疆馳驅靡盬愧迂儒之寡效會將父之敢言而臣父每書勗臣

以致身大義無辜內顧忠孝二字著爲家箴清白芳規銘之座右  
臣小心拮据不貽隕越以玷清時皆佩臣父之嚴訓也茲乃栝棧  
在痛管苴復悲慚子職之有憾仰天恩于無窮安敢不收淚陳情  
以臣父應得卹典哀鳴于皇上之前察得大明會典并卹典條例  
內凡兩京三品官并父母曾授本等封者俱炤例祭葬又一欵三  
品父母曾授本等封者無論亡故先後一視其子以爲差等其已  
經考滿者祭葬全給而未經考滿者雖曾授本等封與祭一壇減  
半造葬今臣父以覃恩而授正三品誥命臣以督粵實歷正三品  
俸奉旨考滿在案臣父今日正與考滿祭葬全給之例符合伏祈  
皇上俯念烏私普施覆露敕下該部炤例議覆給與應得卹典微  
獨臣父啣恩地下卽臣未盡血氣一息尙存永矢捐糜于勿替矣  
崇禎十七年正月二十五日上奉 旨

合請父母卹典疏

原任兵部左侍郎加服俸一級加俸二級陞總督薊遼兵部尙書  
畱部管事丁憂臣張 謹奏爲微臣忤恃雙摧痛深罔極泣血陳  
情仰懇天恩給卹以光泉壤事痛惟致身之義篤于顯揚孝治之  
仁弘于錫類臣某河南磁州人繇天啓壬戌進士歷任縣令省員  
鄉寺督樞者二十一載簪筆掖廷力除偏倚纓冠楚難首剪二源  
入佐樞機交勗砥矢實奉臣父母教訓小心謹慎無貽隕越然驅  
馳之日多菽水之日少炎荒萬里限隔遐塗自顧晨昏缺焉定省  
比先帝召臣還部始得奉親燕邸望九頽齡有如風燭壬午剖血  
瀝陳獲邀聖鑒予假侍歸纔抵金陵臣母原封淑人許氏以九月  
廿九日無疾告逝辟踊天涯攀號莫及越明年癸未扶襯歸葬臣  
父原封兵部右侍郎仁聲復以十一月廿六日溘然見背逾年內

外怙恃兩失哀毀之積幾淪異物因思半生竊祿自悔遺親一瞬相依旋悲風木向微恩假得治含歛臣卽毀死猶爲侈民此臣之大痛也先後以臣母父卹典上請兩奉該部察例具覆之旨今年正月間署部事臣侍郎楊汝成據例覆題正在候旨而逆賊犯順神京失守悵家國之瀕危抱君親之大痛越在泥中空懷靡及頃之淒迷莽澤躑躅江濱望宿草而涕零瞻故山其啜泣蒙霜犯露寧旅荒原直履雪衣罔近城郭誠自耻不人不子之身難容天地耳恭遇皇上龍飛南服振起 聖德遐敷弘仁永錫臣煢煢鮮

民自分稿絕而烏鳥有懷曷能自己遲回三月始敢援例具疏上籲天聽察得大明會典一款凡京官三品父母曾授本等封者無論亡故先後一視其子以爲等差其已經考滿者祭葬全給未經考滿者祭一壇減半造塋欽此臣父母先以單恩授正三品封臣

以督粵三年考滿在案是臣父母正與祭葬全給之例符合況臣不材玷樞任歷五載無功蒙敘祿秩三加愧蒿棘餘生俯叨于身者真斗筭之逾涯而本源酌卹仰籲于天者或高深之不斷伏望皇上曲體啣卹之私廣推幃蓋之德敕下該部參察典例具疏覆題予以應得祭葬微獨臣親九原有知世世啣結卽臣土草餘息一日尙存感激恩光永矢捐糜于勿替矣臣不勝祈懇顛望待命之至弘光元年八月廿六日封進廿八日奉 旨張鏡心平生端望粵東戰功丕著三年考滿與父母祭葬全給例合禮部參稽典例從優議伏該部知道

禮部覆給祭葬卹典疏附

禮部議覆爲微臣怙恃雙摧痛深罔極懇恩給卹以光泉壤事  
祠祭清吏司案呈奉本部送准禮科抄出原任兵部左侍郎陞

總督薊遼兵部尚書雷部管事仍加服俸一級加俸二級丁憂  
臣張鏡心奏前事奉聖旨張鏡心平生端望粵東戰功丕著三  
年考滿與父母祭墓全給例合禮部叅稽典例從優議覆該部  
知道欽此欽遵抄出到部送司案呈到部該臣部看得孝子之  
致其親也雖一命之榮情深捧檄而聖主之隆其臣也自三品  
而上例有加恩如原任兵部左侍郎陞總督薊遼兵部尚書雷  
部管事加服俸一級加俸二級張鏡心者督撫兩廣考滿三年  
羽儀夙著于瑣闥威望并隆于甌越屬有藍臨之寇震彼沅楚  
之疆本官以隔省督臣奉援征勦提白沙青犢之兵鎮烏蠻獠  
獍之亂雲興兩粵以東席捲二源之北雖峰迴馬東水峻橋飛  
莫不覆彼深巢蕩其醜孽功收勘定事闕辭庸旋乃入叅樞密  
統贊戎機跋歷五年晉秩三級虛懷抱月不矜臥鼓之勛大業

銘鐘遘膺一品之寵察會典凡兩京三品文官並父母曾受本  
等封者炤例祭墓本官旣以督粵考滿其父母曾受三品封矣  
合炤例全給祭墓又一欵三品父母曾受封者無論亡故先後  
一視其子以爲等差今本官又以兵部侍郎陞任尚書加服俸  
三級進階一品應有特恩出自皇上異數且當其在粵援楚著  
有軍功爲人所抑未經論敘亦不應泯泯者蓋安危注意國倚  
封疆之臣風木霑恩永揚幽卹之典斯自朝廷勸激推恩之大  
權非臣部所敢擅擬也等因奉 旨張鏡心父母祭墓准炤一  
品例給欽此欽遵抄出到部送司案呈到部擬合就行爲此合  
行炤會本布政司察炤本部題奉明旨內事理遵炤會典欵開  
凡一品官父母受封者祭二壇卽便移二司官一員將祭墓等  
一體欽遵察給施行須至炤會者

工部覆給祭葬卹典疏附

工部覆爲微臣怙恃雙摧痛深罔極懇恩給卹以光泉壤事屯田清吏司案呈奉本部送准吏部咨開禮科抄出本部右侍郎管題覆前事並奉旨緣由備咨到部奉批速察行奉此察得原任兵部左侍郎陞總督薊遼兵部尙書留部管事仍加服俸一級加俸二級丁憂臣張鏡心所請父母應得祭葬旣經禮部題覆卹一品例已奉明旨該本司察卹會典一品官全葬例該料價銀三百兩夫匠銀二百兩相應請文卹會河南布政司備辦前銀送赴本宅造墳安葬仍委廉幹官一員前詣墳所督理工程完日報部等因稟堂奉批准卹行奉此案呈到部擬合就行爲此合行卹會該布政使司察卹來文事理卽便速行料理完日報部以憑回奏施行須至卹會者

乙酉懇 恩終制疏

原任兵部左侍郎加服俸一級加俸二級陞總督薊遼兵部尙書留部管事丁憂臣張鏡心謹 奏爲感德投誠懇 恩終制事臣河南彰德府磁州人繇壬戌進士任兵部左侍郎壬午三月陞總督薊遼兵部尙書因舊督張福臻復任加銜留部管事五月請假送母還鄉九月二十九日喪母癸未十一月二十六日喪父甲申二月襄事值秦賊之變初避海外再播江干隱居池太湖山間遙聞

皇上殲賊綏遺復中國之大仇建千古之高義土草餘息感嘆高深願歸覆載奈萑苻滿道鱗羽莫通今年八月間關北歸擬趨赴闕廷仰申朝見奈麻衣苴履禮不敢入 國門伏祈

天恩俯准終制則錫類弘仁啣結永永勿替矣 順治二年十一月





